



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

Manipur nung Loktak Lake
renlokdaktsütsü: Sarbananda Sonowal

Civilian lenir Suu Kyi küm pezü
atema tepuokdaki yokogo



VOL. XIX NO. 60 (ADOK 60) DIMAPUR SANGTENNÜ (TUESDAY) LUCHII (DECEMBER) 07, 2021 ₹ 5.00

Nagaland Police-i Indian Army anema FIR benok

Kohima, December 6, 2021 (TYO): Indian Army indang 21st Para Military Force ajanga Mon district kübok Oting yim nung tai maketba nisung 13 tepset ta tai tonglokja Nagaland police-i FIR ka agütsüogo.

"December 4 nikongdang 3:30 ako meta Oting nung nakmati aturtem Tiru nungi Bolero Pick Up gari ka nung mener yimdaki meyipa ari. Parnok Upper Tiru aser Oting tsüingda Longkhaio atongdang sepaitemi kecha meshii dang injang khaloktsü aser idangji Oting nung arika asü aser arika kanga mejungi yirutsü" ta FIR nung shia lir.

Iba mapang police guide maliasü mesüra sepaitemi police station nungi parnok asoshi police guide memeshi, ta FIR nung shia lir.

Anungji, iba ajanga sepaitemi civilian tepsettsü aser yirutsütsü tebilemba nung aruba sayur. Anungji bangdakpurtemi aibelenertem nem tapet temerenshi agütsütsü mepishir, ta Nagaland Police-i ashi.

Külen, Director General of Police (DGP) Nagaland T John Longkumer aser Commissioner Nagaland Rovilatuo Mor nati anogo ana atalokba indang sangdong balala social media nung prokshir.

Sangdong anaprong nung Assam nung amenoka aliba 21st Para Special Force-i civilian tepsetba atema tai tonglokja lir.

"21 Assam Rifles sepaitemi maitsü jangjatsü memerangi nakmati aturtem dak injang khaloktsü" ta tenaprongi ashi.

"December 4 nikongdang 4:10 ako meta nakmati atur yimdakilir 8 tashi Tiru nungi Pickup Truck ka nung mener arudang sepaitemi (21st Para Special Force) maitsü kecha masüingdang khaset" ta sangdong nung shia lir.

Parnok ajak ya prangpong mabenba civilian tem dang liasü aser Tiru valley nung aliba nakmati atudak nungi Mahindra Pickup truck ka nung mener meyipa arudang khaset. Iba mapang anü mai liasü aser idangjisa nisung 6 asü aser ana kanga mejungi yiru.

Injang khatokba ola angashiba sülen yimdakilirtem tesem tonga ao. Parnok tonga aodang Pickup truck angu aser Special Forces Personnel-i yimdakilir tasü mang 6 ji alepbanger tanga pickup truck (Tata Mobile) ka nung miima enokya aliba angu. Sepaitem jagi tasü mangtemji parnok

indang tesepi bener aotsüba liasü.

Tata Mobile nung tarpaulin kati nembanga aliba tasü mangtem anguba sülen yimdakilir aser sepaitem tsüingda raratep aser idangji yimdakilirtemi Special Forces Personnel indang gari asem rongdoktsü.

Iba mapang sepaitemi yimdakilirtem dak injang khaloktsü dang nisung 7 khaset. Special Forces Personnel-i Assam tsütsü jena aodang mashimashi injang khaloktsü ta tenük kuli angurtemi ashi.

Lendong atalokba etsem nung gari ajak agi pungu lir. Yimdakilirtem mener aruba Mahindra Pickup, Scorpio, Bolero, Tata Winger aser Tata Mobile ka lir.

Iba anogo yimdakilir 13 tashi tepset, 14 kanga mejungi yiru aser 8 terara yiru.

Kanga mejungi yirur nisung anaji sepaitemi Assam tsütsü anir oa aser tenaji tang Dibrugarh Medical Hospital indang ICU nung anioka lir.

December 5 nü Mon jila nung atalokba indang osang agütsüba nung Konyak Union (KU)-i Helipad, Mon town nung tasür 13 den lokti asüpila sentep sentong agitsü metetdaktüsü. Ajisüaika, parnoki sentongji Hombarnep dang 10:00 ako nung agitsü athi saka iba indang osang tejangja magütsü ta shia lir.

Iba ajanga tesentepertem ratadaktüsü aser nisung telok ka tejashi nung District Hospital aser Konyak Union office leni ao aser office raksatsü. Iba telok jagisa Thamnan Ward nung aliba 27th Assam Rifles post-i ao.

Nisung telok jagi AR tesep tonga ao aser lung agi aonba den kiojentem raksatsü aser ki asem nung mi senoktsü. Idangji Assam Rifle sepaitem injang khatok saka iba ajanga telok taliba jashidaktüsü.

District Administration aser Police ketdangsürtemi telokji süngjemdaktüsü merang saka nisung 600-700 shi adenshiba ajanga parnok maziüktet.

Ghonda ka shi raratepdang Assam Rifles sepaitemi ano injang khaloktsü aser idangji nisungtem jenshi. Iba sülen tesem tonga oa reprangdang Chi nung ka indang tasü mang angu aser IR personnel ka dena nisung 6 tashi injang agi yiru.

NHRC-i Centre & Nagaland dang osang tejangja meshir

Guwahati, December 6, 2021 (Agencies): Hombarnü National Human Rights Commission (NHRC)-i Centre aser Nagaland sorkar dang Mon district nung sepaitemi civilian 15 tepsetba indang osang tejangja meshiogo.

Honibarnü Nagaland kübok Mon district nung Army Para Commandos-i telungpurtem mendanga atatdang taimaket nisungtem aibelenana khasetba indang osang media ajanga angazükba sülen NHRC-i iba tetuyuba agütsü.

NHRC-i Union Defence Secretary, Union Home Secretary, Chief Secretary aser Director

General of Police, Nagaland dang hopta trok tsüingda iba tatalokba indang osang tejangja agütsütsü mapang atakzüktsüogo.

Iba osang nung Special Investigation Team (SIT)-i bushisüingdang asüba, tasür Next of Kin (NOK) nem teyari agütsüba, yirur nem medical treatment agütsüba aser iba lendong agütsürtem anema ken o tem benokba adentsü.

December 6, 2021 nung media osangtem ajanga State sorkari bushisüingdang asütsü atema Special Investigation Team (SIT) ka tentetogo. Külen, Army-ia Court of Inquiry tentetogo, ta NHRC-isa ashi.

Mon district nung asürtem den asüpila sentep sentong agi



December 6, 2021 nü Helipad Ground, Mon nung asüpila sentep sentong agidang tasü mang süngdentem yua aliba angur. (Mon, December 6)

Dimapur, December 6, 2021 (TYO): Indian Army-i December 4 aser 5, 2021 anogotem Oting aser Mon nung tepsetertem den tanü asüpila sentep sentong ka agiogo.

Hombarnü Helipad Ground, Mon nung iba sentong agi aser Chief Minister Neiphu Rio, Dy. CM Y. Patton, Minister Metsubo Jamir, Minister Neiba Kronu, Minister Pangnyu Phom, T.R. Zeliang aser Konyak MLA ajak aden.

Mon nung den külemi mangyimtsü atema onok yangi arua ir. Nagaland state ajunga Konyak nung den külemi lir" ta Chief Minister Rio-i ashi.

Indian Army-i tai maketba Naga nung tepsetba atema ENPO-i küm shia December 4 & 5 anogotem Black Day amongtsü, ta paisa ashi.

Nagaland nungi 'Disturbed State' aser AFSPA agientsü atema state sorkari rarayonga arur, ta Rio-i metetdaktüsü.

"Nagaland state-i tangsa AFSPA agiendaktüsünür saka Centre-i

magientettsü ta ashir. Ajisüaika, Nagaland tensa süngjema kümogo anungji AFSPA benoktsü nungdak kecha madoker" ta Rio-i ashi.

"KU, KNSK aser KSU teloktemi külem memorandum agütsüba nung aliba onüktem nung state sorkari inyaktüsü aliba mapa inyaktüsü aser Centre-i inyaktüsü alibatem asoshi State sorkari nenshia inyaktüsütsü" ta CM Rio-isa metetdaktüsü.

Nagaland CM-isa sorkari tasür kibong shia nem Rs 5 Lakh agütsüba osang metetdaktüsü.

Union Home Minister, Amit Shah-ia tasür kibong shia nem Rs

11 Lakh aser sorkar mapa kaka agütsütsü metetdaktüsüogo, ta Rio-isa ashi.

Iba sentong nung Konyak MLA tem, ENPO, Konyak Union, KNSK, ENSF, KSU, Oting, Jakphang aser Chi Village Council nungi teshimtet nisungtemi o jembidang tatalokba aitsüba den AFSPA agientsü takhangba agütsü.

Sentong nung mendenji KSU Vice-President Yuwang Konyak liasü, KBCM Pastor Rev. Nahngom-i temoatsü meshia sarasadem aser Executive Secretary, KBBB-i tasürtem den asüpila mapang agia liasü.

Mon district nung tatidang athir

Dimapur, December 6, 2021 (TYO): Mon District nung tensa mejungi akümba ajanga December 6, 2021 nungi sorkar aser nija school ajak nung tatidang ajak athir ta Mon Deputy Commissioner-i metetdaktüsü.

Directorate of School Education (DoSE)-i State Board/CBSE indang tatidang athiba osang metetdaktüsüogo aser tarutsü nung tatidang agitsüba osang ashitsü ta Deputy Commissioner-isa shisem.

NSF-i tiptema mokdangogo; Hornbill benjung athitsü ayonger AFSPA agientsü atema 'special assembly session' agitsü akhanger

Kohima, December 6, 2021 (TYO): Naga Students' Federation (NSF)-i tanü ghonda 6 mokdang ayonga amongdang volunteers aser sepaitem tsüingda mangatettep kar adokba dak alia tiptema agiogo.

Naga civilian tepsetba anema aser tasür kibongtem den külemi lir ta sayutsü atema mokdang ayongzük, ta NSF president Kegwayhun Tep aser general secretary Siipuni Ng. Philo nati ashi.

NSF indang federating unit temi pei pei telongtet nung mokdang ayong aser tanep 6:00 ako nungi anüingdang 12:00 ako tashi Naga nungeri shilem agiogo.

Iba mokdang nung sepaitem mesenzütsü atema tenokdangba agütsü saka Kohima, Dimapur aser Phek kübok Meluri nung Assam Rifles sepaitemi tesep toktsür adokba ajanga mepetmesü adok saka lennir taintem aser NSF ketdangpurtemi parnok meyipa yok, ta NSF President Kegwayhun-i ashi.

Naga nung aser talisa federating units aser subordinate

bodies ajak dang pelar, ta NSF-i ashi.

State sorkari nübertem taginüba metettsüla aser Hornbill benjung athitsüla kechiyong tang ya benjungtepba aser pelatepba mapang ka masü, ta parnokisa metetdaktüsü.

Ajisüaika, state sorkari tekong meranga noktakra nübertem Hornbill festival nung shilem magitsü ayongzük ta NSF-isa ashi.

Nagaland nung kin hoho kari iba mapa tamajung aitsüba dang masü saka yimjak nung pei pei kin dang Hornbill festival nung madentsü mepishiba atema tenüngsang agütsür. Tanüngba kintemia kasa tangatetba nung noktaksüla aser pei pei kin dang iba benjung nung madentsü ashitsüla, ta NSF-isa ashi.

State aser centre sorkartemi takoksa angur nem teyari agütsüba metetdaktüsüogo saka Naga nung sen agi malizükettsü ta sorkari metettsüla, ta NSF-isa ashi.

"Tapayutsü azütokshiogo anungji parnok nem akhüm agüja Naga lima nungi Armed Forces

Special Powers' Act agientsüla" ta parnokisa ashi.

State sorkari SIT tentetba atema tenüngsang agütsür saka iba bushisüingdang ajanga nübertemi aginüba temeten angutsü asü masü'ar meshiteter. Anungji retired supreme court mesüra high court judge kati lenisüba luden ka tentettsü bushisüingdang südaktüsü mepishir, ta NSF-isa metetdaktüsü.

State sorkari Centre dang Nagaland nungi AFSPA agientsü atema mapang shia shiyonga arur. Anungji sorkari jembiba ama mapa inyaka sayutsü atema State Assembly indang special session ka jazüksüla aser Centre dang AFSPA agientsü atema ashitsüla ta parnokisa ashi.

Tanü ghonda 6 mokdangdang NSF-i "We stand in solidarity with our Naga brethren - The innocent civilians who were brutally killed at Oting village, Mon district", "Indian Armies - Foes of the Naga People", "Nagas have every right to live in peace" tezülubatem bener shilem agi.

Hornbill Festival atema sorkari telemtetba magi

Dimapur, December 6, 2021 (TYO): Nagaland sorkari Hornbill Festival athitsü mesüra amongtsü telemtetba kecha magi lir.

December 4 & 5 anogotem Mon district nung sepaitemi yimdakilir 14 khasetba sülen state sorkari Hombarn atema Hornbill Festival mamongtsü telemtetba agi.

Deobarnü Nagaland nung tongti kin aikati pei pei nübertem dang Hornbill Festival nung shilem magitsü tetuyubatem agütsüogo.

Külen, NSF aser Naga Club-i state sorkar dang Hornbill Festival athitsü mepishia metetdaktüsüogo.

Ajisüaika benjung tongti ayonger Tourism Department

terata ka nung lir kechiyong state sorkari benjung amongtsü mesüra athitsü osang kecha magitsü lir.

Tang osang ka ajanga angazükba agi asüing Mongulbar anepdang 9:00 ako nung State Cabinet senden ka amentsü aser idang jiang Hornbill Festival atema tatembang telemtetba ka agitsü.

Mokokchung district anepdang 6:00 -12:00 pm tashi mokdang



Mokokchung, 06 Dec (TYO): Mon district kübok Oting yimdak Indian sepoy-temi nisung aika kaseta südaksüba mangyim jashi nung Ao Senden-a adener aser parnok puküma aser nungitba tamaitü sayua Mokokchung district rangben nung anepdang 6:00 nungi anügdang 12:00 ako tashi mokdanga mungtsüogo. Mulungku tamaitü sayua Ao Senden office nung wako tanak songa liasü.

Iba mokdang sentong timtem kecha mataloki takok ngua tembangogo. Kasa mokdangji Mokokchung town nung dang takok ngua among masü saka Tuli, Mangkolemba aser Changtongya town-tem nunga kanga metsünga reta amungba osang ajanga angazüker. Iba mokdang nung All Ward Union Mokokchung Town lenirtemia Ao Senden den yaritepa liasü.

Asen state nung Armed Forces (Special Powers) Act, 1958 ya aliba ajanga Indian

sepoy-temi tashiyim aser azütokshiba mapa aika inyaka arudaki, anungji, iba ya yakta agiintsüla aser iba dak sentakba nung Naga nung ajak lungiemer noktaksüla, ta Ao Senden lenirtemi iba osangbener den jembidang ashi. AFSPA atema ya asenoki shimtetba tatar-temi tatar salang nung benoka jembitsüla aser iba ya agiintsü asoshi telemtetba agitsüla, ta parnokisa tebilemba ka lemsatöp.

AFSPA ozüing anar Indian sepoy-temi 1994 Dec ita Mokokchung town nunga azütokshiba aser tashiyim mapa inyakogo, yamaji tanga district nunga atalokba osang lir aser tang ya Oting yimdak Konyak nung dak ataloker. AFSPA ali tashi iba ama mapa ya ataloktsübas, anungji, iba ozüing tamajung anema noktaksübaji tang ya mapang tetemsü lir aser iba ozüing anema Ao Senden-ia telemtetba kar agitsü tebilemba lir, ta parnokisa metetdaksü.

“Tanü Konyak nung dak atalokba ya parnok kisüing khuret masü, ibai Naga nung songjen tebilemsü lir, anungji, Naga nung lungiemer noktaksüla”, ta Ao Senden lenirtemisa metetdaksü.

Tanü alima yimjung kishi lapoker Govt of India den Naga yimden tebilemsü dak sentakba nung teti asoshi political solution jembiba mapang ka nung, iba ama azütokshiba ya ajak asoshi tia kanga maka, ta parnokisa tesasaba olen ka metetdaksü. Aji oda, State Govt.-i iba dak sentakba nung tekaratiba nung mera kar agitsüla, ta parnokisa shisem.

Tanü iba mokdang sentong nung Aor Telongjem Mokokchung town, All Ward Union Mokokchung Town, Mangkolemba, Changtongya aser Tuli town nung shirnokisa yaritepogo, parnok ajak dang pelaba den nüburtemi amalitepa nungitba asoshi ajak dang pelaba Ao Senden lenirtemisa metetdaksü.

Mon nung nisung tepsetba mechi Hornbill sentong athi

Kohima, Luchii/Dec. 06 (TYO): Mon district nung December 4 aser 5 nung security forces temi civilian tem tepsetba mechi Hornbill benjongmung nung sentong balala ayongzükertemi asürtem nem akum agüja tongtipang sentong thia liasü.

Nagaland Adventure Club (NAC) ajanga 2 buba Great Hornbill Adventure Trail (GHAT) 2021 athiba sangdonga liasü, koba December 7 nungi 9 tashi agitsü liasü.

Indian army special forces temi Mon district nung civilian tem tepsetba ajanga tensa

mejung kumdaksüba mechi aser mang yima aliba Naga nung nem akum agüja GHAT 2021 athir, ta NAC ajanga iba sentong nung shilem agitsüpur, patrons, co-host aser yimtsüngtem dang metetdaksüogo.

(Maneni tapak 3 nung...)

Mulungdangtsü Otsü 33 kakat ka saya



December 06, 2021 anogo nung Aoyimkü Baptist Arogo tenzüker amenba kidang “Mulungdangtsü Otsü 33” kakat sayatsüba mapang kakat zülur (achijilen nungi trokbuba)Maong Jamir den agiba noksa ka yangi angur

Dimapur, Dec.06 (TYO) : Nisung taküm tajungba küma yanglutsür aser tanüla kümzüksü lenmang sayur, Wb. Maong Jamiri züluba kakat ka tenüing agi “ Mulungdangtsü Otsü 33” tanü December 06 Tentonü Aoyimkü Baptist Arogo office nung arogo tenzükertem den kinungertem kar lia Tir Yimyim yimozülur, Wb.K.Temjen Jamiri sayatsüogo.

Iba kakat nung mulungdangtsü otsü semerasem rongnungji, kidang kibong nung tsüraburtemi rongsenbo peria agütsü saka tesayuba shitak magütsü, sayutsüingi o bo ashir saka mapa agi inyaka mesayur ta asüba agi tanurtem taküm raksadaksüba taküm kulitem lir.

Iba kakat nungsa tsüraburi

tanur yi aser sali moko alii odaksüba ajanga parnoka yi aser moko sali lar akümba aser tsüraburi moko sali achiba nungi tanur tebokbok nung tashidak adoka timtemdaksüba otsütem shia lir.

“Oba, na kolenisa aoer, ni’ na kanga menungrar, ni tanur tila asügdang nai ni nü teberem nung apungdang shiranga anepa liasü. Tanga nai ni pungra aneptsü amai bilemer. Imlibilema yakta kidangi shilangang. Ni nü den kangasa ajurutepner,” ta drugs chia senzür tebu dangi shiti ka zülua toktsür par jabaso süadokba otsü ka iba kakat nung shisema angutsü.

“Asen lima nung asenok rongsen, tesayur aser sayutsüingir agibo manünger saka asenok nisung taküm

shitak yanglutsür, tsürabur aser tesayur, kakat zülusang Maong Jamir ama nisung agi anünger, iba jagi asen lima majunger,” ta iba kakat sayatsüba mapang iba kakat sayatsüri ashi.

Iba kakat ya Aoyimkü Baptist Arogo nung sannüker Rev.Temsüi sarasadema meshitetsü. Iba kakat jenjang ya sen 180 agi angutsü.

Wb.Maong Jamir ya Unger nung aser Prodigals’ Home, Dimapur nung Assistant Director liasü. Pai tamalena “ Shiba Aitsütsü ?” aser “ Motivational Illustrations and Stories” kakattem zülua lir. Pa ya achiajem nung mazüoktet taküm yanglushinertem atema mongin tesayur tajung ka lir. Pa den mobile number 81318 65765 ajanga tongtepratep sütettsü.

Nagaland BJP lenir 12-i TMC nung adentsü akok

Guwahati, December 6, 2021 (Agencies): Meghalaya nung 'political coup' ka ajanga BJP-i opposition party tongtiba akümba sülen Trinamool Congress (TMC)-i tang Nagaland nung lenmang lapoktsü meranger.

Meghalaya nung tawa tu Congress MLA 17-i party toktsür TMC nung aden.

Nagaland nung BJP nung temolung masüba lenir 12 tashi tang Kolkata nung mongzuka lir aser parnoki TMC lenirtem den ajuruteptsü. Parnok ya Assembly nung taoba deputy speaker ka lenisüba kübok lir aser yakta TMC nung adentsü imlar.

Parnok ya tang teinyakdak MLA tem masü aser tanishir kar talisa Deputy Chief Minister Y Patton nung lenisüba nung mepelar ta Nagaland BJP osang ka ajanga angazüker.

“Onoki Kolkata nung amongba lenirtem meteta lir. Parnoki party

lenir kar aser talisa Deputy CM lenisüba nung mepelar” ta BJP lenir kati ashi.

Ita ishika tejakdang Nationalist Democratic Progressive Party (NDPP)-i opposition party Naga People's Front (NPF) den külemi lokteper sorkar akümba atema parnoki party lenirtem aitsür ta paisa metetdaksü.

BJP lenir telok kati NPF den tesentaktep tajung ayu aser iba ajanga NDPP lenir aser Chief Minister Neiphui Rio amokmerena liasü. Anungji NPF den angateteptsü atema aser BJP lenirtemi par sorkar matsüngdokdaksütsü atema sorkar nung NPF dendaksü.

BJP sasep nung mepetmesü ya küma ana tejakdang adokba liasü. District president aikati mapang balala nung iba tebilemsü atema jembiaka khuret magien lir. Nagaland nung züingsem 60 agi akümba Assembly nung BJP MLA 12 lir.

Naga Council Dimapur ajanga tanü CSO senden ayonger

Dimapur, Luchii/Dec. 06 (TYO): Indian Army ajanga December 4 aser 5, 2021 anogotem Oting yimtsüng aser Mon Hq nung tai maket civilian tem tepsetba dak sendakba nung Dimapur nung aliba lokti tetent ajanga den senden ka December 7, 2021 anügdang 11:30 ako nungi tenzüka Naga Council Conference Hall, Nyamo

Lotha road, Dimapur nung amentsü, ta Naga Council Dimapur indang tongti zülur Thsapongkyu Sangtam ajanga sangdong ka nung metetdaksü.

Anungji iba senden nung Hoho/Union tir aser tezülur/tribal president tem ajunga arua adentsü ayongzüker, ta kasa sangdong ajanga ashi.

Mon nung civilian tepsetba maneni aitsür

Dimapur, Luchii/Dec. 06 (TYO): Mon district kübok Oting yimtsüng nung December 4, 2021 nikonkdang Paramilitary Forces temi Konyak nung adianu aika tepsetba atema kanga aoksar aser stingmanger, ta Chakhro Angami Kuda Union (CAKU) sangdong ka ajanga ashi.

Mon nung aliba nüburtem den molung khuremba lemsatepa Paramilitary Force temi tai maket Konyak Naga nung tepsetba asoshi CAKU ajanga khukhua aitsür aser ano maneni Armed Forces Special Powers Act (AFSPA) amshia nisung masü ama amshiba atema kanga sempaba lemsateper.

Anungji Government of India ajanga Nagaland nungi AFSPA agientsü ajungshir aser Nagaland sorkar dang iba lendong süoki ia bushistingdanga iba timtem ajurua alir kibongtem nem tim obendang agütsütsü akhanger, ta CAKU ajangasa ashi.

Mangyimer kibongtem den CAKU ajanga asükhu lemsateper aser Tulusang Tsüngremi iba tammang tia ajangtetsü asoshi

taochi agüjang ta sarasademer, ta sangdong ajanga ashi.

Indian Security Forces temi meimchir masüba yimya amshia December 4, 2021 aonung Mon district kübok Oting-Tiru area nung aser December 5, 2021 anepdang Mon Town nung tai maket nübur ter dak tema tepsetba atema temolung shiranger, ta Nagaland NGOs FORUM (NNF) sangdong ka ajanga ashi.

AFSPA osang tesashi tenüing nung iba ama tazü mapa inyaka nisung tepsetba ya ajaki aitsütsü langa lir. Aibelener nem tapet temerenshi magütsü tashi tapet ketdangsüri telemsa makai mera agitsüla aser AFSPA ya tekeratiba nung agienang ta ajungshir, koba Nagaland state nung 1985 küm nungi amshia arur, ta ashi.

Tang mepetmesü mapang onok Konyak nüburtem den lir aser mangyimer kibongtem den asükhu lemsateper. Tulusang tsüngremi parnok molungjang nung tesunep agüjang aser asür tanüla teti tatem maka tesunep nung anistungzükjang ta sarasademsür, ta sangdong ajanga ashi.

Indian Sepoy-temi nisung tepsetba anema Watsü Mungdang-i ku-kua aitsür

Mokokchung, 06 Dec (TYO): Dec 4, 2021 nü Mon district kübok Oting yimdak Indian sepoy-temi tai maketer nisung 15 tashi kahsetba atema kukua aitsür, ta Watsü Mungdang tir, Wt. S. Arenla Longkumer-i sangdong ka ajanga metetdaksüogo.

Meimchir dak maketba shisatsü dener taochi makai inyakba mapa ya tebang agi meshiteti aoksar. Iba ya tawa tasen ataloker masü saka taoba mapanga Indian sepoy-temi telungpur tenüing amer nisung rishikangshiba den nisung meyi aika tepsetogo, yimtsüngtem rungtoktsüogo, tetsür tanur dak tashiyim mapa tamajung inyakogo aser tang yaa kasaji atalokerba dang, ta Watsü Mungdang tir-isa ashi.

Naga nungeri AFSPA anema küm talangka lungkak aiter, aser tawa nisung aika tepsetba yagi ano

akhi ozü mulung yirutsür aliba nung tanaben rishitsür. AFSPA tashi anar iba ama taokatsü aser tashiyim mapa inyakba ya khenyongi magizükteper, anungji, ibai nisung ajaki sashisashia aitsütsüla, ta laisa ashi.

Iba mapa ajanga nüburtem o sepoy-tem tsüingda tamang katetba nung ongdang tulu adokdaksüogo, aser Indian sepoy-temi otia/jakdaka meimchir temeten aser nüchiso anema inyakogo aser iba khuretji nenoki abentsü. Bangdak amertemi yaktatiba nung aibelenertem anema ochi obendang agütsütsü akanger, ta Watsü lenirisa metetdaksü.

“Iba tammang mapang ka nung toktsür aoba asür kinungertem, Konyak adianutem aser Naga nunger ajak den mangyim jashi aser mulungku lemsateper”, ta laisa metetdaksü.

Saisapong ajungketsü atema sorkari yaritsü: Pema Khandu



Itanagar, December 06, 2021 (Agencies): Lanurtem tim masüba aser temesepba mozü amshiba/achiba maparen nungi pilar lidaktsütsü atema State nung saisapong ajungketsütsü atema senotsü teyari agütsütsü ta Deobarnü Arunachal Pradesh Chief Minister Pema Khandu-i ashi.

East Siang district indang headquarters, Pasighat nung 'Adi Sports Fest-2021' shibangba sentong nung Khandu aden.

Saisapong dak sendakba asayamung ayongzüksü atema taruba budget session nungi state sorkari senotsü peria yutsütsü, ta Khandu-i ashi.

"Arunachal nung saisapong tsütsü sempet tajung alir lanur jenti lir. Temaba jenjang nung tokteptsü asoshi saisaponger tajung adokdaktsütsü nukjidong yur onoki inyaktsü aser iba dak sendakba nung asalentong yanglutsü asoshi sports department nem maparen nungloktsüogo" ta CM Khandu-isa metetdaktsü.

Iba saisapong benjungmung agitsü sentong balaka atongtetba aser iba asayamung meraketa agiba atema Khandu-i Adi Bane Kebang (ABK) lanurtem dang pelaba

metetdaktsü.

Lokti tentet ajaki Adi Bane Kebang (ABK) indang tatishitsü tajung nung anidaktsüla, ta pai ashi.

Arunachal Pradesh nung lisapur kin timba aliba rongnung Adis kin ya asütsü, kong subtribes balala lir.

Iba asayamung omen - 'Say No To Drugs' atema tenüngsang agütsüba mapang, Khandu-i, lanurtem temesepba mozü nungi pilar lidaktsütsü asoshi saisapong dak tashi lir, ta ashi.

Temesepba mozü amshiba anema State Sorkari inyaktsü ta metetdaktsüba mapang, Khandu-i, iba anema (temesepba mozü amshiba) Sorkar kisüngi rara aser takok angutsü makok, ta ashi.

Khandu-isa ABK indang tetsür telok dang pelaba metetdakja liasü.

Adi tesem nung temesepba mozü amshiba anema raratsü asoshi item telok yagi yakpang ser inyaka arudar, ta pai ashi.

Tanü lanurtem ya tarutsü indang lennirtem, shirnoki State nung maparen balala achaayangtsü. Tim masüba mapa talisa temesepba mozü amshiba nungi pilar lidaktsütsü asoshi, asenoki parnok dang

tesayuba agüja anepalutsüla aser tim lenmang nung anitetsüla, ta Khandu-i ashi.

Pasighat nung de-addiction centre ka densema tanga tesem balala nung lapoka aliba de-addiction centre tem indang nung jembiba mapang, Khandu-i, item centre nung alirtem atema facility tajungba agüja aser kiojen tajungba yanglushitsü nungdaker, ta ashi.

Item de-addiction centre indang kiojen tajungba yanglutsütsü asoshi Sorkari takaratiba nung maparen tenzüksü, ta Khandu-i nangzük.

Kasa sentong nung, Khandu-i, Azadi ka Amrit Mahotsav shilem ama, December 19, 2021 nü Pasighat nung Siang River Festival ya meraketa ayongzüksü, ta metetdaktsü.

Iba sentong dak sendakba nung Deputy Commissioner ajak den Pasighat nung senden ka amentsü, ta pai ashi.

Ibuba Adi Sports Fest 2021 asayamung nung Adi tesem nungi nisung 600 agi shilem agiogo.

Adi tesem nung East Siang, Siang, Upper Siang aser Lower Dibang Valley district tem indang shilem kar dena lir.

Assam nung süpokrem agir school sub-inspector ka apu

Guwahati, December 06, 2021 (Agencies): Süpokrem agi ama temolung melemi bilemba atema Deobarnü Assam indang Sivasagar District nung Directorate of Vigilance and Anti-Corruption ketdangsürtemi Sub-inspector of schools ka apu.

Nazira indang sub-inspector of schools-i Nagaland aser Assam arrtsü anasa shisaliok reju (educational institute) ka semdangba mapang tesayur ka maliba (absent) metet. Pai iba tesayur ya pa indang office-i jaok saka la (tesayur) aotsü melena, ketdangsür (Sub-inspector of schools) den ajuruteptsü atema lai la kinungbo yok.

Iba mapang sub-inspector yagi la mapai maruba aser kaketshir nem chiyongtsü

magütsüba nung atemer la (tesayur) mapa nungi anentsütsü amokmerena süpokrem sen 15,000 meshi.

Iba ken o bener tesayur kinungboi Directorate den ajurutept aser iba tashishiba angadangba sülen Nazira kübok Amolapatty nung Sivasagar Police teyari agia Vigilance ketdangsürtemi ketdangsür aputsü sentong atong.

Deobar anüngdang, tesayur kinungbo ket nungi süpokrem Rs 15,000 agiba sülen, sub-inspector of schools ya apu aser pa ket nungi iba Rs 15,000 ngutetogo.

Iba maparen dak sendakba nung Prevention of Corruption Act, 1988 (2018 küm benokba ama) kübok ken o ka benokogo aser ozüng agi melaba ama tim inyakyim tenzükogo.

Assam sorkari Gurudwara nem Rs 5 crore agütsütsü

Dhubri, December 6, 2021 (Agencies): Assam Chief Minister Himanta Biswa Sarma-i Sikh nunger Guru Teg Bahadur indang 346 buba Sahidi Divas nung aden.

9 buba Guru indang benjungmong nung Gurudwara nem Rs 5 crore agütsütsü ta CM Sarma-i metetdaktsü.

Pai ghonda ka shi Gurudwara nung tetushi agüja kazü aser Gurujana-i inyakba mapatem atema tenüngsang agütsü.

Iba sentong nung Guru Tag Bahadur Sahib-i züluba Sikh nunger temeshi kaket azüng. Chief Minister

Sarma-i kaket nung zülua angashiba atema pelaba metetdaktsü aser Gurudwara nung wazüka yua aliba kaket reprang.

Northeast India nung aliba Sikh nunger atema teshimtet nüboji Sikh Pratinidhi Board Eastern Zone, Dhubri Saheb lir. Kümshia North East aser India kübok tesem balala nungi tekülemer meyirjang aikati Dhubri nung aliba Sahidi Divas semdanger.

Dhubri Gurdwara nung Sahidi Divas sentong nung jembidang Assam sorkari Rs 5 crore agütsütsü ta Chief Minister Dr. Himanta Biswa-i osang metetdaktsü

Mon nung nisung ... (TAPAK 2 NUNGI..)

Indian army indang para commando temi parnok jangratemtsü mechi dangar jashidakja mapa tamajung inyakba aitsüba mapang, asür ajunga mang ayimer aser parnok kinunger, Konyak nunger aser Naga nunger den tejashi lemsateper, ta NAC ajanga ashi.

State sorkar, Tourism Department, shilem agitsüpur, iba sentong ayongba Kijümetouma, Ruzazho, Hebolimi aser Lazami yimtsüngtem dang aser nüburtem dang koda masüba timtem aremzüksü atema NAC ajanga mepishia liasü.

"NAC ya club tejangja ka lir aser mapang tajung ka nung ajaki imlaba ama inyaktsü," ta ashi.

Western Angami D' Sports Association-ia tetsü-tebou yimya nung Mongulbarnü agitsü aliba Stone Pulling Ceremony thinentü telemteba agiogo. Iba sentong ya Peducha nung akatsü liasü, saka Mon district kübok Oting yimtsüng nung

mitkartemi tapi agi senti takum samatsür alir nem akum agüja iba telemteba ya agi.

Tang mangyim tejashi mapang Konyak nunger adianutem aser Eastern Nagaland People's Organisation (ENPO) den onok dena lir.

Kohima kübok Kisama aser danga district tem nung Hornbill Festival tanungba anogo pungo athitsü atema state sorkar nungi tang tashi osang sangdonga mali, saka Hombarnü sentong kecha magi.

Kasa mapang district balala nung aliba kin tentet tongti temi pei kin dang tarutsü nung osang ka magütsü tashi iba benjongmung nung shilem magitsü totuyuba agüja lir.

Chief Minister Neiphiu Rio aser cabinet minister tem Mon district headquarters Helipad Ground nung asürtem den tepila sentong agiba nung dener meyipa shilangba sülen state sorkar aser Tourism department Hombarnü senden ka amentsü lir.

Meghalaya police-i teintet rogotem nem abensüoshi talem agütsü



Guwahati, December 6, 2021 (Agencies): Meghalaya Police indang 6th Battalion aser Meghalaya Police Academy/Police Training School Umran nung staff aser Police Personnel-i teintet rogotem nem abensüoshi talem lema agütsü.

Christmas matongdang Ri-Bhoi district kübok Niangbyrnai

yim nung parnoki iba mapa inyak. Meghalaya Police indang 6th Battalion nung paramedical staff-i COVID-19 vaccine agitsüba indang osang metetdaktsü aser COVID-19 inyakyim bentshitsu ashi.

Ri Bhoi District kübok Children Homes, Old Age Homes aser Shelter Homes nung

parnoki süoshi aser sü talemtem agütsütsü.

"Meghalaya Police nung Police Personnel, medemertem aser temeimertemi iba mapa tajung nung molungsoa yaritepba atema kanga pelar" ta 6th Battalion, Meghalaya Police, Commandant Lakador Syiem-i ashi.



TIR YIMYIM YIMOBILEM (EDITORIAL)

DIMAPUR SANGTENNÜ, LUCHII (DECEMBER) 07, 2021

Asenok tai kümogo !

Asen adianutem, kanga meranga inyakba senso tajungtem, kenyongi tai maketba purtem, Mon district kübok Oting yim anasa India sepaitemi khasetba asürtem, mang arem-marema India kilo kilonser Amit Shah-i yashi tatar senden nung jembidang, sepaitemi parnok amenba gariji soit saka manen ser ajentsü merangba agi parnok dakji akhatsüsa aküm ta metetdaksüba o jagi, nisung khaseter sepaitemji metentsüogo. Linük nung kilo kilonseri tatar senden nung yamaji tejangja shitetter süra, Oting nung India sepaitemi Naga nunger ayangertem pei kidangi meyipa aruba mapang khasetba lendong atalokba indangji kechi koda bushisüngdangtsü ? Kilo kilonseri Naga nunger mangyimer mulung süngzüksütsü melen, pa o agi mangyimertem jepaka nüksü malutsüsa talila mulung zürepdaksüogo. Mon nung item asürtem asüpila sentep sentong nung, Nagaland Chief minister-i asür kibong shia teyari center government-i sen lakh terkaka aser aser state government-i sen lakh pungongo den government mapa kaka aser yirua alirtem nem sen meyirijang tenemnem agütsütsü ta metetdaksüba sülen mapang tatsüka lir külen Amit Shah-i iba o ya tatar senden nung ayongayonga dang metetdaksü. Pai iba o yagi Naga nunger mulungjang kanga yirutsüogo. Tesasatsükaji, iba asüpila sentep sentong nung asür aser yirua alirtem nem senotsü teyari agütsütsüba osang Chief minister-i metetdaksü dang, asen nübertem yangji dena alirtem rongnung kari tepelar amai ola adoka teka maa agizükba to liasü. Tanü putu nungbo, sentong tagidak nung alima kinük pezü sülen nungi nübertem repranger asünungji, alimai asenok jakla aser shisatsü komaka repranger alitsü ? Nisung taküm den sen aser government mapa medemdangtsü makok. Sen aser government mapa agi nisung taküm ka menoktsü makok. Sen aser government mapa agütsüba alima sobaliba awashi yimya ka dang, yangji kecha balaka pelatsü mali. Ashiko, asenok pelaba ngur Amit Shah-i par sepaitem mapa metentsütsü apusor asütsüsa akok. Yashinep asenok asüpila sentep sentong magi tashibo India government-i tai maketba Naga nunger khasetba mapaji tatem tashi jungjunga bushitsü ta jembiba angashi saka asüpila sentep temerbo asenok tai kümogo. Iba nung ya asenok asoshi tangazüksü aser tebilemdangtsü onük tongtibang keta lir. Asenoki inyaksüba mapa aser nükjidongji tai maketba asen adianutem khaseter kiralongrar sepaitemji pua parnok mapa dak alang temerenshi asenoki meteta agütsütsüla aser tang atalokba lendong amai joko tarutsü nung mataloktsüsa, Naga lima nungi Armed Forces Special Power Act agientsüla. Iba özüng yagi India sepaitem nem parnoki teraka danga temulung melemi bilemra nisung dak akhatsü aser ki tashi nunga bomb ajungoktsütsü tashi aser temeten agüja lir. Tetezü, India sepai kati, "ni pa dak temulung malem bilemra agi khaset," ta ashi nung ojang, aji pa temeten. Linük nung iba ama özüng tamajung, nisungi metizüktettsüsa, India sepaitem nem asenok khasetdaksütsü asoshi tashi aser temeten agüja lir. Iba tashi amshia, India sepaitemi Manipur state kübok Naga nunger yim ka tenüng agi Oinam yimtak nung 1987 küm tai maketba yimtaklirtem reshikangshiogo, 1994 küm December nung Mokochung town nung ayatai ta asütsüsa atalokogo aser iba sülen 1995 küm Kohima nung gari tyre poka angshiba nung aoksar town ajaklen bomb yoka tai maketba nisung taküm samatsüogo. Iba tashi nunga asenok Naga nunger longjemer AFSPA özüng tamajung ya agientsüsa takok ngua meinyaktet. Atangji, iba özüng anema Naga Peoples for Human Rights (NPMHR) purtemi supreme court nung ken o benoka lir, saka küm 30 nunga ochi obendang mangur. Iba ama özüng agi melaba tashi tulu amer asenok khasetba, yirutsüba aser maksütsüba anema, tashi itshir, asenok Naga nunger longjemer nokdaksüba mapangji tang ya lir. Ashiko, iba özüng ya mali asübo tang Oting nung atalokba lendongjia matalokla. Asenok ya temulung kanga mazüng, asenok dak langka tamajung ataloklibo asenok kanga ain adoka jashiteper, saka anogotem süitema aodangbo asenok timtem takoksa aser maksü ajuruba to amadoker. Tasür kabo süogo, joko parnok kodanga asenok dangi meyipa marutsü, saka asenok longjemer parnok khasetba kuliji tatem tashi bushia orr teinyaktsü ka inyaktetra, tarutsü putu tajung kabo parnoki alangzüksür asütsü. Atangji, alima nunga parnok dak atalokbaji mamatsüsa asenok longjemer long kabo azüngtsüla aser iba jagi asenoki asenok inyaksüba mapatem mamadoktsü. Iba amaji ka asenok longjemer tanen makai meinyakra, joko Amit Shah-ibo tasürtem aitsüogo aser sepaitem metentsüogo.

OLEMSABANG

KOBA RONG SHIMTSÜ

~ Süpongnügang Longkümer, Darogapathar, Dimapur

Shirnoki ni meimer aser kü özüngtem penshir parnok dang putu meyirjangsa meyirjang aochir. Nai kibuba nü Tsüngrem tenüng amajok nung tettetshi ,kechaser shibai amajok nung pa tenüng tetshidir kibubai pa memerenshi-I malitsü Taz 5: 10:11. Itemi nai nü chirtem dang nendaka sayutsüla, na kidang mena alitang aser lenmang nung jaja tang, aser mejang dang aser shishi tang item indang jembidang. Nai itemji temaitsü asütsü asoshi nü teka nung alenlokkang, aser itemji nü tenütsü nung temaitsü asütsü asoshi alitsü. Taz 6:7, 8. Kechi koma ka sentsü nülokdir nülokaka seplasepshiba aser demlademshiba , demle salale ta asüba Tsüngremi maginür. Taküm Tsüngremi anogo 7 nungi meimchir taküm mesütsü atema anogo 6 agütsü. Anungji otsüla obula nungeri anogo asem nung ken aonung Tsüngrem külemtsü shimtet, iba aonung abuani-a asüngtetta alitsü lemteter Bothbar aser honibar aonung Tsüngrem külema arur; Nai Kibuba nü Tsüngrem tsüpuang aser pa tenüng agi azüngashitsüla. Na meketa aliba bendanger tsüngremtem sülen manidaktsüla, kechaser nenok rongnung aliba Kibuba nüTsüngremji tenükmeba Tsüngrem lir; Ashiko nenok anema pai ain adoktsü aser pai nenok alijak nungi samatsütsü. Taz 6 : 13- 15.

Nineve Yimti ya Israei nunger atema tsükchir tamajungtiba liasü, tetezü bendannger. Tsüngrem tsüngdang-a kanga majung , saka samatsütsü Pai kanga apayua liasü anungji kümzüksü asoshi sayutsüngidaksütsü Tsüngremi yona Nineve jagi yoknü saka mangaeTarsshisi rong ka nung mener jena aor Tzüyim tüzem tulu adoka rong raksadi ta alitang Rong tanishibai pa tangi arua asüngtang na ya kechi tetezü, amui aosang shishiang aser nü Tsüngrem tang sarasatemang ,aji oda süra asenok kümzüksü. Saka pai tadok meshia sarasatemtsü melena tüzüim nung ajongokjang ta ashiba yong ajonga arua tüzüim nungji inoktsüba ajanga yipruji anen aser rong nung alir tanüngba ajak kümzük. Iba rong nung alirtemji süngyanglu külemertem liasü, iyongjiang parnoki bei tsüngrem tang ayimden ta Lai nung shia angur. Lendong tulu ana angur. Rong lendong ka, aser Nineve samatsütsü lendong ka , saka rong lending nungi kümzük Nineve Kümzüksü sayüsüngi yoka Nineve kümzük; Paji Tsüngremi shimtetba tenzüker, saka alima Rong nung amenba ajanga tesamatsü lendong nungi kümzük. Tsüngrem sentsü mewangshitsüba temulung temerang angatetter Yona tapu 1:

Kenü anogo Yisu aser Pa nütsüngtem den Rong ka nung menür awatsüng ajanga külen jagi aotang Yisu mejanga doker lia awatsüng nungji yipru mopong adoka Rongji tzü nung angema lendong nung liasü. Idangji nütsüngtemi Yisu mesua ashi, asenok tesamar; Aser Pa shishia mopong aser tüzemji arütsü nung tüzemji süngjema aküm. Idangji Pai parnok dang asüngtang nenok tamang kong ali ??? Aser Parnoki tsüpua adok aser süngmangsetta kati ka dang ashi, ajiangla mopong aser tüzemji tashi angatsüba iba nisung ya shiba. (Tsüngrem angateter seplashishira koda???) Khrista meyong Rong nung amener ajak Pai lendong nungi kümzüksü. Mathi 8: Luk 8 :22-25 yisui tepo dang Ni parnok den alitang, nai kü nem shirsa agütsü, nü tenüng ain agi parnok sots ayu; aser Laishiba ataloktsüsa tesamatsüba chir dak alema parnok rongnung ka danga mesamai ni anük. Nai parnok alima nungi penür oang ta ni memepishir saka nai parnok tamajungba nungi sodang ta mepishir Yoh 17: 12,15. Tanüa Pa dak chichia amangertem tamajungba ,aser tesamatsü nungi pai kümzüksü. (Tesamatsü tetezü temenen)

Oang tüzüim aser ali takong nung nokdaka aliba tenyari koba kaketlong lapoker ama lir, nai aji penür arung, " ni tenyar dang jagi ao aser kaketlong tilaji kü nem kua ta pa tang asüngtang. Pai kü tang ashi agiang aser ya Chiang, iba yagi nü tepok tako kümdaksütsü saka nü pang nung ninang mojitzü ama tanang alitsü. Ni tenyar ket nungi kaketlongji agizüka achi, aser kü pang ninang mojitzü ama tanang liasü saka ni aji chir kü pok tako aküm. Idangji kü tang ya ashi " nüpurtem, kintem, oshitem, aser chubatem indang nai tanapen ainkar o jembitsüla. "Laishiba azüngba agi asen menen bilemtetter aser pa meteta akümer, aser tadok ngua pelasetter, aser alima kintem dang pa osangtajung sangdongdaksür. Haliluya Amen. Öcet azünger ajak Tsüngremi moajang.

WORLD SOIL DAY ANOGO MONG 5TH DECEMBER

Tsüngremi yangluba rongnüng tongtipangtiba ji Ali (soil) ya ka lir, aser iba Ali ya ajanga alima nung taküm alir asoshi chiyongtsü tapu meyi-aika, tzü, ali rongsen balala aser ano item dak alaka taküm ka soda alitsü nungdakba jenti angur.

Saka asenoki iba ali ajanga ajangzükba nung dang temulong ajak agütsür, ali anepalutsüba asoshi temulong magutsü/ memetetba ajanga takoksa asür teraksa aika ajurur.

"World Soil Day"amongba ajanga item timtem aser teraksa yanglushia, asen sasa Ali koda meima amshitsü iba tangazükba tem sayutsü asoshi amanger, kechiyong Ali ya makara taküm alitsü tamakoktsü.

2002 küm the International Union of Soil Sciences (IUSS) ajanga Ali nung asür Ali ajanga meimchir dang masü saka taküm aliba ajak koda ajangzükter item tongtipang onüktem shisa danga December 5 anogo ya World Soil Day ta nungja ajatsu telemtetba ka ajanga asüngdanga liasü. World Soil Day ta asüba ya mezüng Thailand chuba Bhumibol Adulyadej ajanga jatet anungji tanü World Soil Day kum shi-a ba asoba anogo nung amonger.

June 2013 nung United Nations indang the Food and Agriculture (FAO) Conference indang amongdang lokti ajaki mülonga 68th buba UN General Assembly nung World Soil Day ya alima ajak nung December 5 nung amongtsü temelaba meshi, aji oda kum shia iba anogo nung Soil Scientists 60,000 dak tali-aki alima tesem balala nung omen balala dak ajemdaker sentong akir. Aser tanü item Soil Scientists tem dang masü saka asenok aluyimer aser ali wadang nung sodaka alir ajaki shilem tajung agitsü nungdaker.

2021 kum asoshi omen-ji "Stop Soil Salinization, Boost Soil Productivity". Iba omen dak ajemdaker nisung temang anema alitsü asoshi anepaluba mesüka, Ali koda anepalutsü, minerals kechi lir aser kechi nungdak aser iba Ali rajang/ tapong mekumdaksü-i kumzüka ayutsü asoshi tontipang teinyaktsütem inyakba nung, Ali temo/ mol samaba ajanga tsünüsembong and metsümenü majungba, tzünglu maruba tesemtem mesüra tzü agi anungba Ali nung koda züsentsü, item amala onüktem nung scientists temi inyaka arudar.

World Soil Day amongba ajanga alima nung aliba meimchir nungi tenzüka taküm aliba ajak asoshi koda iba Ali ajanga taküm ka sota (sustain) ayür ibaji angatetdaksütsü nukjidong lir. Ali dak tzü aser minerals lir aser ibaji aonsotsü, süngjanglijang, süngdonglidong balala- i ayer aser itemji shiruru aser nisungtemi achir, anungji Ali ya kanga dang tongtibang kechiyong chiyongtsü ajak asoshi Ali nungi tenzüker.

Anungji asenoki Ali kümzüka ayutsü aser Ali anepalua iba nungi taküm alitsü World Soil Day amongba ajanga angazükdi.

Courtesy : Division of Soil Conservation, Krishi Vigyan Kendra, Mokochung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Koinonia Prayer Centre nung tanela asentenshi sentong agi



Koinonia Prayer Centre nung ayongzükba asentenshi sentong nung Rev. Zotuo Kiewhuo-i jembidang tangokba noksa nung angur.

Kohima, December 06 (TYO): December 05, 2021 nü Koinonia Prayer Centre, Kohima nung iba Centre tenzüker küm 6 ajungba anogomong amongba den külemi December 3-5, 2021 anogotem nung tanela asentenshi sentong ka agiogo.

Prayer Centre, Tsiesema Basa nung 'Kü ki dang sarasademba ki ta ajatsü' (Mathi 21:13) omen nung ajemdaker asentenshi sentong agi.

Hombarnü Koinonia Baptist Church Media Cell-i sangdong ka ajanga, anogo asemnü asentenshi sentong nung tongti o jembirtemji Rev. Zotuo Kiewhuo, Rev. Khing aser Texas, US nungi Rev. Pam nung liasü, ta metetdaksü.

Asentenshi sentong nung jembidang Rev. Zotuo Kiewhuo-i, "Ner Arogo ya

asentenshiba Arogo ka süra nenok ajanga kin ajak den osangtajung proktsü atema Tsüngremi nenok amshitsü, saka ner Arogo ya taküm alitsü atema dang inyakba Arogo ka süra tatembang anogo nung nenok timtemtsü," ta metetdaksü.

Paisa, "Tanela temeshi ya telempet tamangertem atema masü saka nütsüngtem atema lir. Arogoi nütsüngtem anitetsü makokba ajanga tang alima nung aser Arogotem nung timtem ajurur. Tanela yimlji yimtenren yimli den memeyokteptsüla, kechiyong tanela yimlji nü dak lir (Luk 17:21)," ta metetdaksü.

Koinonia Prayer Centre 6buba foundation Day ya December 5, 2021 nü among. Assistant pastor, H. Rokopra Mekro leniba nung iba sentong

agi aser sentong nung Koinonia Youth Choir aser Men's Fellowship Choir nati ken ka aten. Sentong nungsa temeimertem, teyarirtem aser prayer partners atema temeja sarasadem ka agia liasü.

"Iba Centre nung sarasademtsü aser lumitsü atema nisung 13,838-i register süa lir aser ita shia asentenshi sentong agir. Tang tashi nung alima tesem balala nungi Hindu nunger, Muslim nunger, Tsüngrem dak mamangertem aser süng-long tsüngrem külemer nisung 116 iba Centre nung tzü nung baptitsüogo," ta kasa sangdong ajanga metetdaksü.

Koinonia Prayer Centre ya kanga meshitetba tesem ka lir, kong Tsüngremi tarutsü atema mapa jenti inyaker. 1972 küm mezüng asür, Khrietseilhou-i iba tesem atema shina liasü aser maneni 1978 küm asür, Meguolhou-ia shin aser 2020 küm December 5 nü Vimialuo Kuotsu-ia kasa shina liasü. 1977 küm asür, Rev. Krutsole Yash? aser 2020 küm December 5 nü Vizolhou Mere-i shin. 2021 küm August ita nung Ahile Rume-i, 2001 küm Tsüngremi lai bushia aliba ama iba tesem ya temeshi tesem asütsü ta sayua liasü.

Iba prayer centre nung tanela nung nungdakbapurtem maneni yaria arudar, shirangertem anepatsür, aser temelungertemi 2040 küm tashi asentenshi sentong katsütsü nangzükba lir, ta kasa sangdong ajangasa metetdaksü.

ANO GO ABEN TSÜNGREM DEN

Merüktetang, anasai arung

Tsüngrem anasai arung aser Pai nenok anasai arutsü. Nenok temenenpurtem nenok teka merükang; nenok temulung ana atenba purtem nenok temulung meshitetang. Yakob 4:8

Tekong 7-10 nung shirnoki kümzükba taochi agizüka lir parnok nem ozüng ter agüja lir: Tsüngrem kübok liang, nokdangang, anasai arung, merüktetang, meshitetang, etc. Itemji telunglen mapatem lir. Tsüngremi Pai shimtetba purtem nem Pa taochi agütsüba sayutsü atema itemji inyaksüla. Khristan kati Tsüngrem metetba dangi arutsü aser tali ainba item jaklatemji akatsüla. "Tsüngrem anasai arung!" Kari ashir ibai mekümzüki alir kümzüktsü asoshi arutsü ashiba ta bilemer. Parnoki Pa anasai ora, Tsüngremi kümzüktsü ta bilemer. Saka Tsüngremji ochi aser temeshi lir aser Pai temenen sempar. Pai temenenpurtem den telungjem akatsü makok (aji asenok ajak). Temenenpuri pei temenen meküpdang tashi (aji tamakoktsü) mesüra temenenji azü agi menempang tashi, "Azü metokshi, temenen tatokba mali." Mezüngbuba Tsüngremi asenok shimtet (Yohan 15:16). Asenoki Khristaji asen Kümtetdakba aser Kibur ta agizük, Pai jenjangji agütsü, idangji dang asenoki Pa anasai arutsü akok.

Tsüngremji ochi aser temeshi asü nung, asenoki Pa anasai mao dang tama asenok teka merüktettsüla aser asen temenen nangzüktsüla. Teka temerük Tsüngrem anasai aoba jagi tema taküm aliba yimya sayur. Temulungjang meshitetba jagi asenok temulung nung bilemba, tejangraba aser jakla sayur. Khristan taküm kaji yimya ozüng ka lir, maneni Tsüngrem kübok aliba, anasai aoba, merüktetba, etc. Aseni asen temeim tebu den longjemtsü bushidang item ajak ya inyaksüla.

Oba, ni temenen nungi merüktettsüba aser ni anasai aruba asoshi Ne tenüng asanger. Amen.

'The Chosen' Christmas film ticket nung dollar sen million 8 yokzük

December 06, 2021: "The Chosen" series nung shilem agirtemi "Christmas with The Chosen: The Messengers," film nunga shilem agia lir, aser iba film ya Fathom indang 'bestselling film' film kümogo, ta osang ka ajanga metetdaksü.

The Chosen film ticket ayokba nungi dollar sen million 8 yokzükogo, aser iba film ya Christmas nungtem nung yangluba film ka lir.

Fathom Events CEO, Ray Nutt-i, "Iba film nungja ya khenyongi balaka, ta onoki meteta liasü. Onoki iba film sapurtem aser dang partners dang pelar," ta metetdaksü.

Christmas omen nung ajemdaker yangluba 'The Chosen' film ya theaters nung December 1-2 nung ang sayatsü sentong liasü saka December 10 tashi sayaogo.

Christmas with The Chosen: The Messengers ya Joseph aser Mary na tsütsülen nungi Yisu Khrista asoba indang film lir.

Taoba ita film distributor-Fathom Events-i, iba film ticket

ayok tenzükba sülen mezüngbuba ghonda 12 tsüngda dollar sen million 1.5 jenjang tickets yokzük, ta metetdakja liasü.

Iba film nung music ji Phil Wickham, Maverick City Music, For King & Country, Brandon Lake, We The Kingdom, Cain, Leanna Crawford, Jordan Feliz, Dawson Hollow, Matt Maher, One Voice Children's Choir, Bonner Family & Bryan aser Katie Torwalt nung indang lir.

Kasa film nung o jembirtemji Chosen actors- Austin Reed Alleman (Nathaniel), Giavani Cairo (Thaddeus), Luke Dimyan (Judas) aser Lara Silva (Eden) nung lir.

The Chosen ya Yisu aser Pa nütsüngrtem indang mezüngbuba multi-season television series ka lirs. Producer, Loaves & Fishes Productions-i season ana yanglu aser oshi 50 nung meyipzuka liasü. Item series ya iOS aser Android app stores nunga angati repringtetsü.

Israel nung Sanhedrin mapang aliba kiojen ka ngutetogo



December 06, 2021: Tang mezüng Israel nung archaeologist temi Sanhedrin mapang aliba kiojen ka ngutetogo; Sanhedrin ya akhidang Israel nung Yihuda nung tatartem adenshia senden amenba assembly ka liasü.

Archaeologist temi iba kiojenji Yavne yimti nung ngutet. Sanhedrin ya Yirusalem nung liasü saka küm 2000 tejaken tanabuba tekülem ki raksatsüba sülen Sanhedrin ya Yavne-i belener ao.

Parnoki ngutetba kiojen nung alibatem rongnung lisem agi yangluba marok densema liasü, ta Israel Antiquities Authority

(IAA)-i sangdong ka ajanga metetdaksü.

Parnokisa iba kiojen nungjagi süklep 230 shi pilar leper ka angu. Mongintemi ashiba agi, Yihuda nung aser Rome nung ozüng nung ajemdaker leperji yimti tezülen yangluba asütsü akok.

Israel Antiquities Authority (IAA) nungi Yavne excavation directors- Pablo Betzer aser Dr. Daniel Varga nati, "Onoki tetsüngda kanga pilar leper long aika angu, aser ibaji ajanga iba ya ketdangser telok kati achaayanga inyakba asütsü akok ta bilemer," ta metetdaksü.

Archaeologist temi item leper

nungji shirnok rema aliar memetet, kechiyong lep nungji temaitsü kecha mali, ajisüaka leper nungji Yihuda nung mesüra Sanhedrin züngsem kar arem asütsü akok ta bilemer. Parnokisa leper long tema nung aina agi yangluba pongdang tila 150 angu.

"Item pongdangji kanga senti totzü inoka amshiba pongdang asütsü akok," ta IAA's glass department nung tongti, Dr. Yael Gorin-Rosen-i metetdaksü.

"Item pongdang tesadang shi Israel nung yangluba aser tesadang shia Egypt kübok Alexandria nungi bener arubatem lir. Item ama pongdang ya Yihuda nung aser mamangertem aremba leper nung mezüngbuba Aso (1st century) nungi tasembuba Aso mapang tashi nung ngutetogo. Ajisüaka Yavne yimti nung aliba leper nung anguba pongdangtemji kechiba telung nung masü saka tema nung ang ayuar kuli mejangjar," ta Gorin-Rosen-isa metetdaksü.

Rome nungeri Yirusalem nung tanabuba tekülem ki raksatsüba sülen Sanhedrin ya Yavne yimti belena liasü, aser iba yimti ya akhidang Israel nung tanela tsütsü yimtiba aküm.

OLONG PAITEP # 6019

1		2				3		4		5
				6						
	7		8							
9					10			11	12	
			13			14	15			
16					17			18		
			19			20				
21		22								23
24										
							25			

TIPILEN		LANGTSÜNGLEN	
1. Saku	- (4)	1. Taksep	- (3)
6. Songjen	- (7)	2. Langtem	- (5)
7. Mali/Tazüng	- (4)	3. O tamendaktak	- (4)
9. Tasen apok	- (6)	4. Nütsü tebuba	- (3)
11. Songtem	- (3)	5. Anüngdang tesangwa	- (3)
13. Ata liasü	- (5)	6. Apitet	- (5)
16. Tzünglu den külemi tsüker	- (3)	7. Yagi jungdaksür	- (4)
17. Aso tila	- (6)	8. Anogo semer ka	- (3)
20. Tashi maküm	- (4)	10. _ _ _ tatsü	- (3)
24. Tenüng kasa jatepba	- (7)	12. Tebur kidong aser zünga kasa tsüngda jatepba	- (4)
25. Ki yangluba oset	- (4)	14. Pela agizükba tapu ka	- (5)
		15. Tenüng atet	- (3)
		18. Mejanga onü	- (5)
		19. Talak techira	- (4)
		21. Maneni	- (3)
		22. Nübo teyi	- (3)
		23. Meshi	- (3)

OLONG PAITEP # 6018 TELANGZÜBA

TIPILEN :	LANGTSÜNGLEN :
2. Anükalem, 4. Mesak, 5. Apet,	1. Kündang, 2. Ayak, 3. Leptep,
9. Meimtep, 11. Posü, 12. Patak,	6. Sati, 7. Yiar, 8. Sangküm, 9. Metsük,
13. Tekettsü.	10. Mazü.



ALOKBA O WARAKLA AIWA ASANGWA :

- Alokba** : Ni na meimera.
- Warakla** : Tasaden.
- Alokba** : Ni na aginera.
- Warakla** : Tasaden.
- Alokba** : Ana lidini?
- Warakla** : Tasaden.
- Alokba** : Na ya onsara tebur tajungaja.
- Warakla** : Yamaji na?
- Alokba** : Tasaden.



Lilir : WhatsApp

TANÜBO NAI LANGZÜANG

- Q. Koba Union Ministry ajanga 'SRESHTA' scheme lapoktsü renema lir?
 [A] Ministry of Education
 [B] Ministry of Social Justice and Empowerment
 [C] Ministry of Tribal Affairs
 [D] Ministry of Minority Affairs

(Taruba adok nung onoki langzüsü)
YASHI ADOK TELANGZÜBA : Arunachal Pradesh

AO OSHI ANGAZÜKDAK:

TANÜ ANGAZÜKTSÜBA OJANG



Lima

(n) ali tema, alima (country, earth)
 * Asen **lima** ya kanga topur tajung.

Limeka

(n) kin ka atema alinük mekazüka ayuba (geography)
 *Asenoki alima nung linük balala meyong **limeka** metettsüla.

NAI-A YA METETTER MA



4th US President

James Madison

US Vice President

George Clinton

1808 küm December 07 nü US Tir 4buba ama James Madison shim. Kasa anogo Tatong Tir ama George Clinton shima liasü. 1808 küm November 04 nungi December 07 tashi United States nung 6buba presidential election agia liasü. Iba presidential election nung Democratic-Republican candidate James Madison-i Federalist candidate Charles Cotesworth Pinckney madak takok angu.

SUDOKU # 6060

TELANGZÜBA # 6059

2	7			4	1			8	8	9	5	2	4	6	7	1	3
		8	3		5			1	1	2	3	9	8	7	6	4	5
		3		2		7	4		4	7	6	5	3	1	2	8	9
6	3		8			5	7		7	8	9	1	2	3	5	6	4
9			1			6			3	4	2	8	6	5	1	9	7
1	2			3		8		4	6	5	1	7	9	4	8	3	2
7		1		8	3		6		5	3	4	6	1	2	9	7	8
8		9		6	7	1		2	9	1	7	3	5	8	4	2	6
3						4	8		2	6	8	4	7	9	3	5	1

OJANG LUTEP # 5606

- NDLEONG :
- ALOKDTAANG :
- SÜMA :
- ANMAPG :
- AKAJ :
- NGNU :
- EMÜNTSGR :
- NDE :
- KTENDTESAEP :
- ANYUG :

OJANG LUTEP TELANGZÜBA # 5605

**TAJUNG INYAKTSÜ ASOSHI MAPANG TETEMJEN
 MATAI TANG YONGI INYAK TENZÜKANG**

TAN HOPTA ATEMA - KOMA SÜLA ?

Q. Kisüjensü dang agiba osettem aser asen taküm atema nüngdakba chiyongtsü aser osettem ajak asenoki asen nisungtem dang nungi dang alitsüsa, ajungshitepa, lanurtem nem item mapatemji tenzükdaksü nunga koma süla ?



New Delhi, December 06, 2021: Hombarnü Rajya Sabha senden nung oppsition party balala nungi MP temi longkak aitba noksa nung angur.

Opposition MP temi Lok Sabha senden nungi ayazüka ao

New Delhi, Luchii/ December 06 (Agencies): Nagaland nung sepaitemi civilian aika kasetba dak sendakba nung Hombarnü Lok Sabha nung Union Home Minister, Amit Shah-i sangdong ka agütsüba sülen Congress, DMK, SP, BSP aser NCP densema tongti opposition party balala nungi züngsemtemi senden nungi ayazüka ao.

Amit Shah-i jembiba sülen opposition party temi jembinüa liasü saka Lok Sabha speaker, Om Birla-i mapang magütsüba agi opposition-i longkak aita senden nungi ayazüka ao.

Osangbener den jembidang Congress MP, Manickam Tagore-i, Nagaland nung civilian kasetba dak sendakba nung Amit Shah-i sangdong

agütsüba jagi opposition melung mesüi liasü, ibayongji iba tatalokba anema onoki senden nungi ayazüka ao, ta metetdaksü.

Amit Shah-i, Mon district kübok Oting nung telungpurtem senzüba osang ka angazükba nung ajemdaker army temi telungpur mita aodang gari nung alirtemji telungpurtem asütsüa akok ta bilema injang khaloktsü, ta metetdakja liasü.

Gari nung alir nisung 8 nungjagi parnok 6 kasetba sülen ang aibelener civilian kaset ta meteta liasü; iba tatalokba nung yirua alir ana army temi anasatiba health centre kati anir ao, ta Union Home Minister-i metetdaksü.

"Iba tatalokba osang angashiba sülen yimdaklirtemi

Army unit longbang aser gari ana rongdoktsüba den sepaitem amak," ta Shah-i metetdaksü.

"Iba tensa azüoka lokti senshidoktsütsü aser pei taküm kümzüktsü atema security sepaitemi injang yoktsüsa aküm. Ibaji ajanga ano civilian tenet asü aser kar yiru. Local administration-Police-i iba tensa azüoktsü merang," ta paisa metetdaksü.

Amit Shah-isa, Nagaland nung civilian tepsetba atema linüki sasar, ta metetdaksü.

Honibar aonung iba tatalokba sülen Indian Army-i sangdong ka ajanga iba tatalokba bushisüngdangtsü, ta metetdakja liasü.

Amongnüa longkak aitba mapang civilian ka kaset, iba sülen curfew ozüng benok.

Amarinder Singh-i aniba party-i BJP den lokteper tokteptsü

New Delhi, December 06 (Agencies): Taoba mapang Congress lenir aser taoba Punjab Chief Minister Amarinder Singh-i tawa 'Punjab Lok Congress' party tenteta liasü aser Hombarnü pai, taruba Punjab Assembly Elections nung par party-i BJP aser Sukhdev Singh Dhindsa'er party den lokteper tokteptsü, ta metetdaksü.

Osangbenertem den jembidang Singh-i, "Telemtetba ka agiogo aser menden lemsatsü mapa anüngdaka lir. Onoki Dhindsa'er party (SAD Sanyukt) den-a menden

lemsatsü. Ni party anaprongla (BJP aser SAD Sanyukt) dang takok angutsüpur candidate tem ang shima yaritsü atema metetdaksütsü," ta ashi.

Taruba Punjab assembly election agiba sülen par party-i sorkar akümtsü, ta shia Captain Amarinder Singh-i, "Punjab Assembly elections nung takok angutsüji onok nükjiding lir, aser onoki takok angutsü," ta metetdaksü.

Hombarnü taoba mapang Punjab Chief Minister-isa Chandigarh nung pai aniba party headquarters semzüktsüogo. Punjab Lok Congress nung

adentsü atema membership tenzükogo, ta paisa metetdaksü.

"Ozü party nung adentsü atema district nung committee ka tentetogo," ta pai ashi.

Captain Amarinder Singh ya Congress lenir tain ka liasü saka party telung nung ita aika mangatettep adoka aruba sülen taküm September ita tetenzüklen pai Punjab Chief Minister menden nungi anen aser Congress party-a tokja liasü.

November ita nung pai pa indang party 'Punjab Lok Congress' tentet.



December 06, 2021 nü House Complex, New Delhi nung B.R. Ambedkar asüba anogomong nung asür nem akhüm agütsüba sentong nung linük Tir, Ram Nath Kovind, tatong Tir, M. Venkaiah Naidu, Ato kilonser, Narendra Modi aser Lok Sabha Speaker, Om Birla densema tongti lenirtem adenba noksa nung angur.

India nung tain nütsüng 85%-i Covid vaccine mezüngbuba dose agiogo

New Delhi, December 06 (Agencies): India nung coronavirus vaccine agitsü temsüa alir tain nütsüng shilem 85-i vaccine mezüngbuba dose agiogo, ta Hombarnü Union health minister, Mansukh Mandaviya-i metetdaksü.

Hombar tashi nung India nung coronavirus vaccine dose crore 127.93 dak tema agütsüogo. Union Health Minister Mandaviya-i twitter ajanga, "Ano anogo ka aser alizüng ka tongteter. Linük nung temsüa alir nütsüng 85-i Covid-19 vaccine mezüngbuba dose agiogo. Ato kilonser Narendra Modi indang omen 'Sabka Prayas' nung ajemdaker coronavirus wara anema raraba nung India tejakleni odar," ta metetdaksü.

Amongnüa pai, tang tashi nung India nung tain (arrshi küm 18 ser temapurtem) nütsüng shilem 50 dak temaibo vaccine dose anaprongla

agiogo, ta metetdakja liasü. Tesüiba ghonda 24 tsüngda India nung vaccine dose 24,55,911 agütsüogo aser ibaji densema Hombarnep 7:00 ako tashi nung linük nung vaccine dose ajak senteper crore 127.93 (1,27,93,09,669) agütsüogo, ta health ministry-i metetdaksü.

Taküm January 16 nü India nung vaccination drive tenzüka liasü aser mezüngbuba shilem nung healthcare workers (HCWs) nem tama vaccine agütsüba sülen February 2 nungi frontline workers (FLWs) nem vaccine agütsü.

March 1 nungi arrshi küm 60 ser temapurtem aser comorbid alir arrshi küm 45 ser temapurtem nem vaccine agütsü tenzüka liasü. April 1 nungibo arrshi küm 45 temapur nem vaccine agütsü tenzük aser May 1 nungi arrshi küm 18 ser temapurtem nem vaccine agütsü tenzüka liasü.

India-Russia atema Defence ya tongtibangtiba tongshi: Rajnath



December 06, 2021 nü Sushma Swaraj Bhawan, New Delhi nung Defence Minister, Rajnath Singh-i Russia Defence Minister, Sergey Shoigu ajurudang tangokba noksa nung angur.

New Delhi, Luchii/ December 06 (Agencies): Hombarnü India Union Defence Minister, Rajnath Singh-i, India aser Russia na tsüngda tesendaktep nung defence tsütsü amalitepa inyakba ya tongtibangtiba tongshi lir, ta metetdaksü.

Linük anati alima nung yimjung aser azükaru atema inyakba den külemi tanga onük aika nung amalitepa inyaker, ta pai metetdaksü.

New Delhi nung Russia nung Defence Minister, General Sergey Shoigu den senden amendang okilaa Rajnath-i, "Asen linük ana partnership nung defence tsütsü amalitepa inyakba ya tongtibangtiba tongshi lir. India-Russia partnership ajanga region nung tesünap alitsü aser region tashi itta alitsü, ta ni amanger," ta ashi.

India-Russia 2+2 inter-ministerial dialogue nung jembidang Singh-i, "Tawa India-Russia defence tsütsü amalitep kanga renlokogo. Tang ama tayongzükba aliba

mapang nung Russia ya maneni India atema tongti partner ka asütsü ta ni amanger," ta ashi.

Hombarnü India External Affairs Minister, S Jaishankar-i Russia nung Foreign Minister, Sergey Lavrov ajurua senden amen aser Defence Minister Rajnath-i Russia Defence minister, General Sergey Shoigu ajuru.

Lavrov den senden amendang Jaishankar-i, "India-Russia partnership ya khenyongi balaka. Tang alima nung yimtenren kanga melenshiba ya asenoki meteta lir," ta ashi.

"Asen linük ana tesendaktep aser amalitepa inyakba agi onok melung kanga asür," ta paisa ashi.

Rajnath Singh aser General Shoigu na senden amenba mapang nung linük anati tezüngzüktep aika agi aser contract aika yanglua liasü.

Hombar nikongdang 5:30 ako nungi tenzüka Ato kilonser, Narendra Modi aser Russia Tir, Vladimir Putin nata senden menogo.

Civilian lenir Suu Kyi kum pezü atema tepuokdaki yokogo



Myeik, Myanmar nung election nübuyim mapang tangokba noksa ka nung Myanmar indang democracy busema nokdaker Aung San Suu Kyi-i o jembiba angur. Myanmar nung aliba court kati Aung San Suu Kyi ya kum pezü tepuokdak ayutsü Hombarnü obendang agütsü. Coronavirus tashidak nungi nüburtum kumzuka ayutsü mechi tenokdangba agütsüba ozüngtem nung lai aibelen, ta court ajanga ashi aser iba temerenshi ya agüja liasü.

Yangon, Luchii/December 6 (Agencies): Myanmar indang junta-i Hombarnü civilian lenir Aung San Suu Kyi kum pezü atema tepuokdaki yokogo. Military anema nokdaktsü ajungmesoba aser Covid inyakyim sülen manidakba ken o nung aija la tepuokdaki yok, ta sorkar otongdar kati AFP dang ashi. La anema ken o aika benoka lir aser tang obendang agütsüba ya tetenzüker dang. Ken o tem nung la aia aliba ngutetra la kum aika tepuokdak ayutsü.

Arishi kum 76 tain Suu Kyi ya February 1 nü general temi sorkar atsüngtokba sülen nungi sota yua lir.

Iba sülen la anema ken o aika benokogo, kong official secrets act nung aibelenba aser election nung ochi mashi inyakyim densema lir. Item ken o tem nung lai aia aliba ngutetra kum aika tepuokdaki yoktsü.

Hombarnü Suu ky i ya military anema inyaktü ajungmesoba atema kum ana aser Covid dak sendakba nung tetuyuba agütsür aliba sülen manidakba atema kum ana ta tepuokdaki yokogo, ta junta otongdar Zaw Min Tun-i phone ajanga AFP dang ashi.

Taoba tir Win Myint-a kasa ken o nung aija kum pezü atema tepuokdaki yokogo, ta pai ashiba den tena tangbo tepuokdaki anir maotsü ta shiogo.

"Parnok tang lia aliba tesem nung dang laia ataba mapang tanga ken o tem obendangtsü," ta otongdar-i linük yimtiba Naypyidaw nung parnok sota aliba tesem indang ashi.

Military anema inyaktü atema ajungmesoba ken o ya coup sülen general tem aija lai aniba National League for Democracy party-i jembiba dak sendaka lir.

Covid inyakyim nung aibelenba ken o ya taoba kum election nung nüboyimba mapang aibelen dak sendaka lir. Naypyidaw nung special

court nung ken o angadangba mapang osangbenrtemi shilem agütsü memelar, aser Suu Kyi okatsüra tawa media den sensak masemtsü tenokdangba agütsüogo.

Hopta ishika tsungda NLD nung lenir tejentem kuma aika tepuokdak ayutsü atema obendang agütsüogo

Taoba mapang chief minister ka iba ita kum 75 tepuokdak ayutsü obendang agütsüogo aser ano Suu Kyi nem teyari agütsür ka kum 20 tepuokdak ayutsü obendang agütsüogo.

Iba ken o angazükba sülen Amnesty International-i Suu Kyi tepuokdaki yokba aitsüogo.

"Ken o taila nung Aung San Suu Kyi nem temerenshi agütsüba ya military-i parnok anemertem ajak nokdangtsü aser Myanmar nung nüjiso aletsütsü atema mulungteter aliba tatishitsü ka lir," ta Amnesty deputy regional director for Campaigns Ming Yu Hah-i ashi.

International Crisis Group indang Myanmar senior advisor Richard Horsey-ia AFP dang, iba temerenshi agütsüba ya manga ayangba aser military tashi sayuba ka lir, ta ashi.

"La tepuokdaki yokra taoksatsüka süla. La lar kidang mesera regime indang 'guest house' ka nung tepuokdaki yokba kumtem ya süidaktsütsü akok," ta paisa ashi.

Military-i Myanmar ya kum aika yimsüsüa aruogo aser parnoki taoba kum general election inyakyim nung ochi mashi ken o sendaka lir ta shia parnoki sorkar atsüngba kuli agütsütsü merangdangogo.

Alima kintemi linük nung takaratiba nung democracy benoktsü nongshiba ya general temi ahu ta mali, aser linük kübok tesem balala nung coup anema longkak aiterem tashiyim agi azüoktsü meranga arudar. Deobarnü sepaitemi Yangon

yimti nung yimjung nung longkak aita alir telok ka dak gari agi atsüka aser nisung asem tashi yirutsüogo, ta tenük kuli agütsürtemi shiogo.

State media sangdong ka ajanga ashiba agi, nisung asem rongnung nisung ka kanga mejungi yiruogo aser temelaba memeshi longkak aitiba sentong ayongzuka agiba atema nisung 11 puogo.

Myanmar nung military-i civilian sorkar atsüngokba sülen linük kübok tesem balala nung nüburtum iba anema longkak ait aser iba mapang nisung aika tepsetogo aser aika tepuokdaki yokogo.

Colombia sorkar anema nokdaker lenir 'El Paisa' tepsetogo

Caracas, Luchii/Dec. 06 (Agencies): Colombia sorkar anema telok, Farc indang lenir Venezuela nung mita atar tepset, ta yangji aliba osang ajanga Deobarnü ashi.

Hernán Darío Velásquez shiba dang El Paisa ta ajar, pa ya Venezuela indang Apure state nung khaset, ta ashir.

Pa asüba ya ketdangsurtemi sangdonga mali aser Colombia mitkartemia pa tepsetba memetet, ta ashir.

Pa aputsü atema senpet agütsütsü sangdonga aliba agütsü mechi Velásquez ya tepset alitsü, ta yangji aliba media ajanga ashir.

Ketdangsurtemi pa tasümgang mangu tashi pa asüba mejangjatsü, ta Colombia ketdangsurtemi El Tiempo osangkaket dang ashi. Colombia Tir Iván Duque indang odongtar kati osangbener dang, par office ajanga osang tali bushir, ta ashi.

Farc telok ya Marxist telok ka lir aser kum 50 dak tema Colombia sorkar den rara tesashi aika rara aruba sülen 2016 kum ceasefire sangdonga liasü.

Niger lendong nung sepai 12 aser kiralongrar aika asü

Niamey, Luchii/Dec. 06 (Agencies): Niger anüolen rara agi sünger alima linük asem arütsülen rara ka nung sepai 12 aser kiralongrar ter dak tema tepsetogo.

Fantio nungi kilometre pungo shi pilar kiralongrar noklang aika den raraba mapang ano sepai ti yiru, ta defence ministry ajanga Deobarnü sangdong ka nung ashi.

Lendong agütsürtemi amshiba motorcycle tem raksatsü aser osangtsüsang agiba hadir ngutet, ta ashi.

Fantio ya Tillaberi region nung aliba Tera district kübok yimtsung tilaka lir aser al-Qaeda mesüra ISIL den sendaktepa aliba telungpur telok temi mapang shia iba yimtsung amaker.

Taküm May ita Muslim nunger Eid al-Fitr benjongmung

mapang iba region nung yimtsung ka amakdang nisung pungo asü aser ana kanga mejungi yirutsü, ta ministry ajanga ashi.

June ita tatemlen lendong ka agütsüba mapang civilian ana, school director ka aser mapa nungi anisüngzuka aliba police inspector ka tepset aser lendong agütsüri parnok indang kiset shiruru auya.

Linük anüolen tsütsü ISIL in the Greater Sahara (ISGS) temi lendong agütsüba den ano linük southwest tsütsü Nigeria den arütsü anasa Boko Haram aser Islamic State West Africa Province telok temia timtem agütsür.

Iba linük ya alima nung tesensaktipa ka lir, ta UN indang Human Development Index ajanga ashir.



Kitui, Kenya, Dec. 6 : Kitui County, Kenya nung aliba Enziu ayong nung bus ka mükepoka aliba ketdangsurtemi agitetba mapang tangokba noksa nung angur. Kenya anüdoklen Kitui County nung aliba yimtsung ka nungi passenger 30 dak tema mena aliba bus ka Deobarnü Enziu ayong nung mükepoka nisung 24 asü.

Farc nung tetsübuttsü aketba unit tem rongnung Velásquez ya lenir ka lir aser pai lendong tesashi agütsüba atema ajaki meteta akum.

Colombia yimtiba, Bogota nung 2003 kum social club ka nung pai gari ka nung bomb inoker pokdakja nisung 36 tepset aser 200 jungnüa yirutsü.

Miraflores nung mitkar aser police amenoka alidak 1998 kum lendong agütsüba nunga pai tongti shilem agia liasü, kong security forces züngsem 16 asü.

Iba lendong nung shilem ka ama sepai aser police 100 dak tema pua bener ao. Farc züngsem tepuokdak aliba chiochtsü mechi parnoki pua alirtem ya timba 2001 nung chiok, saka lenir ana kum 12 dak tema pua ayu.

El Paisa ya Farc commander tem rongnung tesashitiba ka akumba ajanga 2016 kum Havana nung yimjung ken o jembidak pa oa adenba mapang parnok ya shidakba nunga nok-o-nü yutsür südi, ta aikati bilema liasü.

Saka 2018 kum pa iba ken o jembiba nungi ainshia kum

ka lir taoba Farc lenir Iván Márquez aser Jesús Santrich den külemi tanaben shilanga Segunda Marquetalia telok tentetba sangdong aser pai ano raratsü ta sangdonga liasü.

Pa ya shidakba asüba asünungbo taküm iba telok nung takoksa tulu tanabuba alitsü. Santrich shiba yimjung maparen nung tongti shilem agia liasü, pa ya May ita Venezuela nung khatetpa mapang Colombia army commando temi khaseta liasü.

2016 ceasefire sülen Farc züngsem 13,000 shi nok-o-nü yutsüogo aser iba sülen iba telok ya political party tilaka dang kuma Colombia indang congress nung menden 10 ngutet.

Ajisüaka Colombia region kar nung maneni azüdokshir, kong iba telok nungi razüka aor 5,000 shi sorkar anema rarar.

Venezuela lenirtemi Farc züngsemtem miimbanga ayur, ta Colombia sorkari aiben tai tongloktsü aser June ita Tor Duque mena aliba helicopter nung amakba ya kidanger linüki tasa yangluba ka lir, ta ashir.

TEPELA LEMSATEPER



ASO:
31.12.1929

ASÜ:
01.12.2021

Onoki teti meima aliba obala asür **Lanuzulu** (Khar) Mangkolemba. Pa alima nungi pila aodang ana aser talang nungi kija kibong lokti balala kwikati nübo rongsen aser tamang sarasadem agi onok nungita yariogo nenok ajak dang pelaba lemsateper. Tsüngremi moajang.

Temeim kinungtsü, jala jabaso, semchirtem.

NLSF-i khu khua aitsür

Dimapur, Luchii/December 06, 2021 (TYO): Mon District kübok Oting yimtsüing nung December 04, 2021 nü 'Friends of the Hill People & 21 Special Para Force' ta nungja agütsüba sepaitemi tai malir Naga nunger tepsetba osang angashia mangyim jashi lemsateper aser Indian Security force ajanga kuli kecha makai inyakba maparen ya Nagaland Law Students' Federation (NLSF)-i khu khua aitsür, ta sangdong ka ajanga NLSF President C. Talimoa aser NLSF General Secretary, Dieku Wetsah nati metetdaksü.

Naga nunger yimjung asoshi yongya ataba mapang, tai malir aser anogoshia ayangertem taochi mesayui tepsetba den aika yirutsüogo. Iba amala maparen khenyongi dang magizüker aser Nagaland nung Indian Security Forces-i taochi mesayui/

mezüngmeshia inyakba maparen ya Federation-i khu khua aitsür.

India-i Universal Declaration of Human Rights (UDHR) 1948 agizüka lir asünung, Security Forces ajanga tai maketba nüburtem tepsetba ya 'humanitarian principle' raksatsür dang aser India-i alima yimjung atema inyakba maparen nung tasüngdangba adoker.

Maneni, Nagaland Law Students' Federation (NLSF)-i asür kibongtem den asükhü lemsateper aser State nungi Armed Forces (Special Powers) Act (AFSPA) 1958 agientsü asoshi State Sorkar dang mepishir aser meimchir anema mapa tamajung inyakba maparen nung dena alir Indian Security force anema ozüing agi melaba ama temerenshi tapet agütsüsüla, ta kasa sangdong nung shia lir.

Angh Jagdish-i Dr.BR. Ambedkar nem akhüm agütsü

Kohima, Luchii/December 06, 2021 (TYO): Mahaparinirvan Diwas anogomung aser India nüjiso ngur küm 75 ajungba - Azadi Ka Amrit Mahostav nungtem nung Nagaland aser Assam Angh, Jagdish Mukhi den pa kinungtsü Prem Mukhi, ketdangsurtem aser Raj Bhavan indang staff temi Hombarnü (06.12.2021) Dr. Imkongliba Ao Hall, Raj Bhavan, Kohima nung Dr. Bhimrao Ramji Ambedkar nem akhüm tetushi agüja narozük inoktsü, ta sangdong ajanga metetdaksü.

Iba sentong nung Angh-i, India nüjiso atema rarar nem akhüm agütsüsü asoshi 'Dandi March' küm 91 ajungba bilemteta March 12, 2021 nü Mahostav tenzük. Prof. Mukhi-i, Dr. Ambedkar ya India nüjiso atema rarar aser lokti nung temelenshi adokdaksüsü asoshi bendanga agüja inyakba nübu ka liasü, shibai lokti nung tekübok jenjang nung alir nübur aika atsüa aru.

Angh-i, Fundamental Duties indang nung jembi aser

Nagaland nung alir senso ajak dang bendanga amshiba maparen ajak agientsü aser Constitution nung rangloker Fundamental Duties nung anidaksü asoshi ayongzüka liasü.

Kasa sentong nung, Commissioner & Secretary to the Governor, T. Mhabemo Yanthan-i, Dr. Ambedkar taküm otsü aser pai ajangzükbatem indang jembiogo.

Dr. Ambedkar ya yimtenren lennir tajung ka, jurist, lokti nung temelenshi adokdaksür aser Constitution of India yanglutsü asoshi tongti shilem agia inayker nübu ka liasü, ta pai ashi.

Dr. B.R Ambedkar ya 1891 kümApril 14 nü Mhow, Madhya Pradesh nung aso aser 1956 küm December 06 nü pai Mahaparinirvan ajangzüktem. Dr. B.R Ambedkar ya India indang mezüng Law and Justice Minister liasü. 2012 küm History TV18 aser CNN IBN ajanga agiba poll nung "the greatest Indian" ama Dr. Ambedkar nem vote timba agüja liasü.

State Commissioner for Persons with Disabilities ajanga metetdaksür

Kohima, Luchii/December 06, 2021 (TYO): State Commissioner for Persons with Disabilities indang Office sangdong ka ajanga, Mon District nung alir matamabensar/tangar memenep alirtem kümzüka ayutsü asoshi Mon District Administration dang metetdaksür.

Shidi ka nung State Commissioner-i, District Level Committee on Disability indang District Commissioner aser Chairperson dang, tang ama tensa mapang lendong mashi

nungi kümzüka ayutsü asoshi matamabensar tem timi repranga aser anepalutsü tetuyuba agütsüogo.

Anungji, Mon Town kübok Oting yimtsüing aser Mon District ajunga nung matamabensar aser parnok kibongtem kümzüka ayutsü asoshi nungdakba mera agütsü aser tang ama lendong mapang parnok (matamabensar) nungdak peridaksüsü asoshi Nagaland State Commissioner for Persons with Disability (PwDs), Diethono Nakhro-i

mepishio

Iba dak sendakba nung, nungdakba maparen inyaksü atema District Level Committee on Disability-i achaayangtsü akok, ta lai tetuyuba agütsü.

Iba den külemi nungdakba ama osangtem bendentsü aser sangoktsüsü atema Disabled People's Organisations, Disabled Parents Organisations aser iba sector nung inyaker NGOs tem anioktsü akok aser District Administration den longjemer inyaksüla, ta kasa sangdong nung shia lir.

Ward 21 Development Committee-i sarusashiba nokdaker

Dimapur, Luchii/December 06, 2021 (TYO): Dimapur Municipality kübok Ward 21, kong colony pezü (Nyamo Colony, Churches Colony, Middle Point Colony aser Notun Basti Colony) dena lir, iba Ward indang Development Committee-i, iba tesem, lenmang indang tenüing amer kija mesüra telok nem tentet mashi lapoktsü/achaayangtsü aser welfare, membership, office maintenance tenüing nung sen sarutsü asoshi memelar, ta sangdong ka ajanga Ward 21 Development Committee, Convenor, Jonah Achumi aser Ward 21 Development Committee, Secretary, Omega G. Naga nati metetdaksü.

Iba Committee-isa, tim area/colony indang council/GB

temelaba magii tekalen agüja aliba kija/tentet nem registration magütsüsü asoshi District Administration dang mepishio.

Ano iba litsü-lika (Ward 21) telungtet nung business welfare associations/unions ajanga sarusajiba/donation maparen aitsür. Atangji nunga, Nagaland indang business community talisa Dimapur nung sarusaji balala agi süngadoker asünung, commercial enterprise community ajangzüksü tenüing nung talila unions/institutions tentetta taa agiba/donations saruba ajanga timtem/khuret talila ang bendenloktsür.

Committee-i, agencies/unions/associations dang item tesem (colony 4) nung ozüing

alema 'tax' saruba maparen tangsa anentsü asoshi tekümdangtsü agütsür, kechiyong union aser organization balala ajanga temelaba magii sarusajiba ajanga tanü tashi tajung kecha madok, saka osettsüset jenjang umketa atuba/timba dang akümer.

Committee-isa, item union/association ajak dang Colony shia nung pei inyakyim talisa lokti maparen mesüra mangatetep mesüra timtem bentettsü aser reprangshimtsü atema Council Office, GB Office aser Youth Body tentetta lir aser item Colony indang maparen nung tebang ayitsü asoshi item union/organization nungdak madoker, ta lepsia metetdaksür.

'Shabaash Mithu' sangküm February nung sayatsü

Mumbai, Luchii/December 06, 2021 (Agencies): Sangküm Women's Cricket World Cup masayadang, February ita Taapsee Pannu-i tongti shilem agiba film - 'Shabaash Mithu' sayatsü.

Alima tesem ajunga nung, India nungeri cinema aser cricket sapua repranger. Cricket asayar Mithali Raj asoba anogo (03.12.2021) film yanglurtemi 'Shabaash Mithu'

sayatsü anogo sangdonga liasü.

Team India Women's ODI captain Mithali indang biopic ya sangküm February 04, 2022 nü alima tesem ajunga nung sayatsü terenemba lir.

Taapsee den Vijay Raaz-i iba film nung tongti shilem agiogo. 2022 Women's Cricket World Cup asayatsü ita ka lia iba film sayatsü. World Cup asayamung ya New Zealand nung March aser April 2022

tsüingda asayatsü.

Shabaash Mithu film ya India aser bendanglen tangokogo.

Taoba ita, Taapsee-i Instagram sabang nung iba film tangokba maparen renemba osang lemsatepa liasü.

Viacom18 Studios ajanga produce asüba Shabaash Mithu indang Creative Producer ji Ajit Andhare asütsü. Iba film ya Priya Aven-i zülu aser Srijit Mukherji-i direct süogo.



Kohima, Luchii/December 06, 2021: Deobarnü (05.12.2021) Hornbill Festival sentong nung alaketa tejaoker ama Chief Justice of Gauhati High Court aser Patron-in-Chief, NLSA Justice Sudhanshu Dhulia denogo aser pai Legal Services Stall semdanga liasü. Justice Dhulia-isa Exhibition semdang, kong Gauhati High Court, Kohima Bench aser Nagaland State Legal Services Authority indang putiotsü aser item tentet ajanga ajangzükbatem sayuogo. Justice Dhulia den Justice Hukato Swu, Judge, Gauhati High Court, Kohima Bench, Additional Judge, Justice Kakheto Sema, Neiko Akami, NJS Registrar aser Victo Sema, NJS, Member Secretary, NLSA nunger külemi tangokba noksa ka yangi angur.

9buba Hornbill cycle rally Kohima nung agiogo



Dimapur, Luchii/December 6 (TYO): Hornbill festival 2021 nung shilem ka ama 9buba Annual Hornbill Cycle Rally, December 5 nü Joint CEO, Nagaland State Disaster Management Authority (NSDMA) GoN, Johnny Ruangmei-i tenzükja liasü. Iba sentong ya Go-Green initiatives, tourism ajungkettsü aser Nagaland nung cycling ya professional sport ka ama benoktsü nükjidong nung 'Go Green, Stay Fit, Reduce Carbon

Emission' omen nung ajemdaker agia liasü. Rally tenzüksüba sentong nung Johnny-i ashiba agi, sentong nung shilem agirtemi tanü agiba jenjang ajanga asenok aliba alima environment health nem teyari agütsüsü. "Meimchir litettsüsa tzi mopung tapet aliba alima ka dang lir aser planet Earth lir, aser tanü iba sentong nung shilem agirtemi asenok aliba alima health ajungkettsü atema teyari tulu agütsüsü," ta pai ashiba den iba

ajanga meimchirtem mopung tajungba agitsü asoshi maongka agütsüsü ta ashi. Iba rally nung cyclists 50 shi-i shilem agi. Iba rally ya Kohima Local Ground temeket nungi tenzük aser km 13 shi jajar Kisama Heritage Village nung tembang. Rally ya Alaphra Group-i ayongzük aser department of Tourism, GoN-i senotsü teyari agüja liasü. Maneni iba sentong asoshi supporting partner ji NSDMA liasü.

India-i tanabuba Test run 372 agi kokogo



Mumbai nung New Zealand madak tanabuba Test koka asayamung 1-0 agi akokba sülen India tema takok marok bener tangokba noksa nung angur.

Luchii/December 6, 2021 (Agencies): Wankhede Stadium nung India aser New Zealand na tsungda tanabuba Test asaya India-i anogo pezübuba nung run 372 agi koka iba asayamung 1-0 agi kokogo. New Zealand run 372 agi akokba ya India team-i tang tashi nung run timtiba agi akokba asütsü aser iba ajanga 2015 küm Feroz Shah Kotla Stadium, New Delhi nung South Africa run 337 agi akokba ajatetogo. Anogo pezübuba nung India team-i minute 45 tsungda tanungba wicket pongu agi asaya ayong ayonga akok. Iba takok ya India nung asayaba mapang takok tajungtiba asütsü aser Rahul Dravid atema coach ama test nung mezüngbuba takok lir.

New Zealand-i Kanpur nungbo kanga meranga toktepa asaya ajisüaka Wankhede nung ball tali bounce asüba aser turn asüba ajanga parnok nem timtem agüja liasü. Ajisüaka iba test asaya nung Ajaz Patel-i inning ka nung wicket 10 agiba ya parnoki teti bilemtettsü. Tanabuba test nung Patel-i inning ana nung over 74.4 aon aser batting-a over 84.4 mena liasü. India nung bowler tem rongnungi Ravichandran Ashwin-i run 34 agütsür wicket 4 aser Jayant Yadav-ia run 49 agütsür wicket 4 agia mezüngbuba session nung New Zealand team run 540 arishiba mapang run 167 dang yanglur ajak out süma. Ravichandran Ashwin-i iba asaya nung India nung asayaba mapang ajak

senteper wicket 300 agiogo. Jayant Yadav tatamsa 2017 küm Test asaya liasü aser pai tanabuba test nung kanga junga asayaa mezüngbuba inning nung run 14 agütsür wicket 4 aser tanabuba inning nunga run 49 agütsür wicket 4 agia liasü. Yadav yiruba aser form nung maliba ajanga first-class cricket nung junga shilem magiteti aruogo, ajisüaka head coach Rahul Dravid-i pa dak tamang akaba ama pai iba test nung asayatetogo. Kanpur nung mezüngbuba Test draw nung tembanga liasü. Tang agi tanabenbuba Virat Kohli-i aniba India team-i New Zealand team run aika agi kokogo. 2016 küma India-i Test asaya tasembuba nung New Zealand run 321 agi koka 3-0 agi iba asayamung koka liasü.

Imkongliba Ao Memorial Trophy thinener

Dimapur, Luchii/December 6 (TYO): Mon district kübok Oting yimtsüing nung security force-i tai maketba yimdaklirtem tepseta Konyak nungertem tang mangyim jashi tia nung aliba akhüm agüja Japukong Youth Organization-i 2buba Dr. Imkongliba Ao Memorial volley ball trophy

osang tejangka ka magütsü tashi thinena atatsü telemtetba agiba sandong ka ajanga metetdaksüogo. Iba asayamung ya December 7 nungi 9 nü tashi asayatsü renemer liasü, saka mapang tensa agi memelaba ajanga thinentsüsa aküm, ta ketdangpurtemi metetdaksü.

Beijing Olympics: China-i US nem tekümdangtsü metetdaksü

Luchii/December 6, 2021 (Agencies): U.S. nung yimden yimsüsürtemi Beijing Winter Olympics mapang diplomatic boycott ka atema ayongzükba ya linük ana tesendaktep nung kongshitsü aliba nungi jenbotsü atema anentsüla aser nungdang dang süra China-i iba anema jenjang tapet agitsü, ta China indang foreign ministry-i Hombarnü ashi. Beijing nung 2022 Olympics nung U.S. ketdangsürtemi shilem agitsü magitsü aji Biden administration-i iba hopta sangdongtsü imlar, ta CNN sangdong ka ajanga metetdaksü. Iba asayamung nung shilem magitsü atema ayongzükertem ya lokti atsüa arutsü atema inyakertem aser parnoki China aser United States na tongtibang tesem kar nung tesendaktep aser sensaksem dak mekonshidaksütsü atema iba inyakyim ya anentsüla, ta China indang foreign ministry otongdar Zhao Lijian-i ashi. "US-i iba tayongzükba ya metoktsüli süra China-i iba anema jenjang tapet agitsü," ta pai osangbenertem den sensaksemba

mapang ashi. China-isa, Covid-19 tapu tasenba Omicron ya Winter Olympics atema tetsükdaksü ka asütsü, ta ashi. US tir Joe Biden-i taoba ita ashiba agi, China indang human rights record anema nokdaksü atema diplomatic boycott ka ayongzüksü asadangdar. Activist tem aser Congress züngsemtemi iba asayamung nung shilem magitsü atema administration nongshia arudar. Deobarnü CNN-i sangdongba osang ya White House-i aitsüogo. Administration tebilemba jangjaa aliba source balala pezüü ashiba agi, Beijing Olympics nung US nung ketdangsürtemi shilem magitsü atema White House nung timba kati mulungtepdar. CNN-i ashiba agi, US-i iba asayamung nung shilem magitsü atema telemtetba agiba ajanga asayartem dak mekongshitsü aser parnoki oa shilem agitettsü. Deobarnü sangdong dak sendakba nung State Department dang ken o jangjatsüsü atema asüngdang saka kecha telangzüba magütsü, ta osang ajanga metetdaksü.

Perth Ashes Test tesem melenshiba CA-i metetdaksü

Luchii/December 6, 2021 (Agencies): Australia aser England na tsungda taruba Ashes series nung Test pongububa ya Perth nung asayatsü liasü saka Western Australia nung arrtsü nung tenokdangba balala agütsür aliba ajanga tesem melenshitsuasa kümogo, ta Cricket Australia (CA)-i Hombarnü metetdaksü. CA-i ashiba agi, taruba küm January 14 nungi 18 tashi Perth Stadium nung asayatsü aliba asaya atema takok tashi merandangogo, ajisüaka teloktem tsungda tangatettep ka dangi arutsü tamakoktsü liasü aser ibayongji tesem melenshitsu atema sensaksem tenzükogo. "Perth Stadium nung Ashes test ayongzükba masayatetsüsa akümba atema onok kanga tezü adanger," ta CA chief executive Nick Hockley-i ashi. "Onoki takok tashi merandangogo saka makok. Arrtsü aser health dak sendakba nung tangatettep ka dangi arutsü merandangogo, saka tamakoktsü liasü," ta paisa ashi.

Western Australia nung COVID-19 tensa kanga junga achaayangba ajanga tashidak menatepba aoba jenjang kanga ajema lir aser tanga New South Wales, Victoria aser South Australia nungi senzüsenpongertem anogo 14 quarantine mesüra arrtsü adena aittsü memelar. Test pezübuba ya New South Wales yimtiba Sydney nung January 9 nü tembangtsü aser ibayongji asayartem quarantine mapang tembanga amungtsü asoshi anogo agi meperitsü. Hobart, kong November ita Afghanistan den Test asaya ka ayongzükba asayatsü liasü, iba tesem nung test pongububa asayatsü imlar. Sydney aser Melbourne ketdangsürtemia iba series nung tanabuba test ayongzükba asayatsü asoshi parnok renema aliba sayuogo. Western Australia sorkari December 16 nungi 20 tashi Adelaide nung asayatsü aliba Test den Perth Test melenteptsü benokdang ajisüaka takok mongutet.

BILEMDANGANG

"Ochi asoshi nokdaksü nongnanga teli."